

碑傳集

第三十一冊
雍正朝監司

乾隆朝監司



卷八十二
之八十四

碑傳集卷八十二目錄

雍正朝監司

通奉大夫陝西西安布政使贈太常寺卿方公觀墓誌銘

李敏

承清圖
敬堂

廣西按察使司按察使白君洵墓誌銘

諸贈通議大夫湖北按察使司按察使唐公繼祖墓誌銘

李敏

顧棟高

陝西按察使司按察使何君師儉墓誌銘

通奉大夫廣東布政使司司承祖墓誌銘

沈大成

常鎮道馬君維翰傳

柔謂元

四川布政使閻公堯熙傳

劉紹弢

觀察黃公世發傳

李崇

通議大夫江南布政使陳公德榮墓誌銘

方苞

中大夫直隸長蘆都轉鹽運使蔣公林墓誌銘

陳黃中

湖北布政使朱公一蜚墓誌銘

王昶

碑傳八十二目



Vertical text on the left side of the page, including page numbers and other markings, such as '八十二日' and '八十二日'.

雍正朝監司

通奉大夫陝西西安布政使贈太常寺卿方公觀墓志銘姚世銜代改筆師
 余與同年友贈太常卿方公稱兄弟交踰二十年比公莅浙而余方守
 湖州公脫略勢分相好加焉嘗戲言曰吾死子必銘吾墓未幾公遷任
 秦中薨於六合之旅次訃聞余為位而哭孰謂魄兆之遽驗白耶今星
 紀終矣余白頭郎署撫存盡往卒徇其子之請以應公識悲夫公諱觀
 字近雯其先由歙遷江都故為江都人家世承傳具公兄襄城令所撰
 厥考贈編修府君誌銘公即編修第五子也少為名諸生乙酉
 聖祖南巡試詩賦行在欽取侍直賜監生中京兆試式明年聯捷成進
 士實康熙己丑選翰林院庶吉士授編修纂修

三朝國史諸書分校

萬壽恩科會試提督四川學政回京分修

大清會典考選改浙江道監察御史協理河南山東道事陞戶科給事中
 中厯署吏戶禮王諸科掌印給事中巡視船廠管理戶部坐糧廳除浙

碑傳八十二

江按察使署理布政使鹽政印務陞陝西西安布政使此公所厯之官
 也公故以交藝進而為政多惠愛於成都捐俸修文翁講堂擇學官之
 有行業者俾聚羣士而誘進之每親臨講畫士胥鬱奮船廠西接盛京
 東界黑龍江三伏如冬公不以邊遠自弛置所陳地方便宜十二事
 俞旨議行異時糧艘橫通州率十抽一二以槩其餘公閱視無漏略者
 而特詳請江浙被水沍爛之漕米分別存放漕卒乃無乾沒賠償之累
 其提刑兩浙也獄無大小問對如家人三數隸旁立拱默不得作聲勢
 以非法虐使富家有塾師逮詔獄吏具文書請行查留貯之箱篋公曰
 罪人已得願欲利主人之所有耶切責之既而聞吏果偽為漏言於富
 家謀以賂解而竟不果賂蓋不事搏擊刻酷而剔削宿弊吏畏而民以
 不冤類如此至於藩庫離務填委糾紛公操刀決滯不遺豪末於是大
 臣慰薦將不次顯用公亦慨然欲有所為而精力殫矣公秀羸善病念
 西陲用兵軍需旁午自西安

命下力疾賃騾車就途隨具摺陳奏

上為馳醫賜參藥病增損輒以聞乃卒不起
 世宗悼歎賻金贈官超常等且聞有子適就禮部試命榜發視中式與

否又命覆闕所遺卷胥異數也蓋公以勤慎券

主知以清白貽後嗣自官奉

恩賜外室無羨財通州有茶果銀四萬五千餘兩公一無所取護鹽政印有養廉銀一千二百兩猶奏而後受自傷祿不逮親而友于兄弟暨

兄弟之子念襄城君有才未展曰吾敢以親故使

朝廷失士遂保舉授今職人不以為嫌與人交洞朗軒闕不可干以私

而款曲盡意性嗜學問文章故遇賢俊尤所託契往往形於詠歌歸安

姚生世鈺抄公遺詩為三卷謂其周旋於親愛倫理之間纏緜悱惻有

溫柔敦厚之遺風焉纂修諸書分條析理同館有疑義總裁率曰盍問

石川石川公舊里名因自號也其見重如此公卒以雍正八年二月初

八日春秋五十配洪氏封安人先卒贈夫人方貧約時嘗脫簪珥以資

公宦學婦德母儀親族稱焉生三子夢駟康熙庚子舉人揀選知縣後

公數年卒次夢駟歲貢生部選雲南徽州府通判

憲皇帝篤念先臣特旨授江西建昌府同知推陞陝西漢中府知府未

上亦卒次夢筆大學生考授州同出為季父後將以乾隆某年某月某

日啟殯歸葬於歙某鄉某里某山編修公之兆以洪夫人附而謁余文

以志公墓者夢筆也嗚呼余於公諸子俱見其幼而長以有成謂公之

不克大潤澤於天下者庶有待於是乃伯仲相繼奄忽且無男子子獨

其季有子華孫福孫安孫者因以福孫安孫還後其兩兄以奉公祀其

尤可哀也銘曰

有美太常聲施業光惟內行之仁厚故其文學政事於時為循吏於朝

為名卿胡遭時遇

主而壽命不長知吾所以為天下惜者千齡萬代視此銘章

廣西按察使司按察使白君洵墓誌銘

李敏

康熙丁酉歲余奉

命典雲南鄉試既出闈頗咨訪地方官吏賢否在城文武官數十員而

雲南人士同舌稱賢不受屬吏陋規者惟雲南府知府白君一人又八

年余出撫廣西而白君先已為其地按察同事逾年用是益知君清重

有德君子人也君尋被

內召還京師明年余遷直隸總督又明年內轉工部方思與君晤言而

君已退居於通州矣又四年為雍正辛亥君年始六十有三遽以疾卒

時五月二十有三日也君同懷兄大學士近薇公潢來請誌君墓嗚呼

余既知君其忍以不文辭哉君諱洵字直侯別字又蘇世居奉天之蓋平縣會祖諱文達遷遼陽始隸鑛白旗祖諱承舉從龍入關始居京師考諱允明仕至榮祿大夫都督僉事駐防廣東參領自考以上三世並以君兄貴誥贈光祿大夫文華殿大學士兼兵部尚書君生而孝友忠信讀書通大義年二十五歲任兵部筆帖式補廣西富川縣知縣富川多獠獠抗賦又時出剽斂前官莫敢如何君至卽嚴爲勸諭曰不率發兵捕治會蒼梧道及平樂副將以佗事督兵道富川君具供張邀諸境上請暫駐三日爲聲援自率健役十數人往捕梗法者曰大兵至矣能聽我悉出首禍人宥可無洗諸獠獠咸恐如令因而撫之期年頑俗盡革督撫奇其才保調南甯府宣化刺邑當交廣之衝左江鎮道所駐剽水陸輻輳頗饒盛吏因以侵漁民困至不可支則譁而亂君謂得其情悉去侵民法其尤甚者糧銀正額外兩加派數錢名曰附封首請勒石永禁民驚喜以服政化大行秩滿遷福建漳州府同知未上以外艱歸服闋補廣西梧州府同知巡撫彭公鵬薦調思明府時土司有爲亂者殺參將勢張甚總督飭總兵官往剿以君爲監紀總兵官巽懷莫能制勝君以計擒其魁兩月而事平擢陞雲南府知府首以廉率屬省會舊

傳八十二

三

有十八行牙戶以通商賈奸偷數人欲專其利賄昆明令請於巡撫總領諸行君獨持不可得止商人立石紀德焉督撫會疏薦陞按察副使分巡永昌道五十九年西藏用兵督辦軍需糧糶芻茭轉運絕徼數千里昕夕籌畫經年始還鬚髮白過半雍正元年

特旨遷廣西按察使明年余至獨倚任君未幾布政使闕員委君併權其事廣西地方二千六百里藩臬兩司事無不統治法刑章益整以暇蓋君四任廣西民之情僞事之利弊毫釐無不洞悉余嘗有所問無不知者知必言言必盡所以裨余者多矣君齒未甚衰猶可以有爲而止於斯余所爲歛歛而太息也君娶錢氏火器營操練尉諱文龍女累封至淑人生子映梧候選府同知女四人候選州同李英贛州府知府施士崗襲世職一等阿思哈尼哈番加一級拖沙喇哈番兼參領祖應樞臨桂縣丞張本闡其婿也側室王氏生子映松一品廕生女一人許字宗人府八品筆帖式兼副佐領張玉孫男女各二人是歲八月十有二日君葬期也玉田縣亮水橋祖瑩君葬地也銘曰西南之荒寔惟粵與滇古所羈縻今大化以臻何以牧之維吏之循君以廉明旣武且文威信大行周歷連綿任滇二粵四凡三十餘年點蒼

之山湘離之川桐鄉愛君永矢弗諼此藏者委蛻弗禦其神炎雲萬里永瞻斯原

孫方伯詔傳 潘挹奎

方伯姓孫名詔字鳳書號友石武威人康熙壬午舉人壬辰進士選庶吉士武威自明季李銳登甲榜官汀州太守至方伯再成進士故吾鄉人

國朝來方伯為甲科開先云方伯既官庶吉士旋請急歸

世宗御極始解館改知縣性伉直不能事上官以故多所齟齬久之

世宗有事於

先陵蹕經其邑天大雪雪積行宮門外數寸故事凡宮門內外糞除之

役實宮監司之宮監有所索于方伯未之允也輒呼縣官來掃雪方伯

擁篲以前謂宮監曰縣官為

天子掃雪豈辱事耶偃僂掃雪不已宮監怒將羣集而毆之於是方伯

引其魁以出飭阜隸縛而加杖是時上官皆伺候宮門外聆之震慄遂

以其實上聞且請罪

世宗覽奏欣然曰此知縣好膽宮監滋事不可赦著交所司治罪而召

見方伯慰勉者再無何擢甯波知府旋遷甯紹台道轉兩浙鹽運使進

江西按察使方伯以

朝廷嚮用方隆竭誠圖報而尤慎於庶獄嘗曰吾不能必人之無冤惟

求己之無悔斯已矣既而晉湖北布政使未及離任卒於南昌時雍正

十有一年也始方伯守甯波兩浙累有大逆案

詔罷其省春秋貢士特設觀風整俗使宣揚

國家所以激厲之意而大中丞奉天王公持節至浙警飭之者既諄且

備旋與總督宮保尚書彭城李公學使翰長交河王公交章上言浙人

洗心滌慮痛自湔除而復科一事猶未得聞以請也會方伯莅甯謂諸

生以立品奉公為上而有倚託青矜不急國課作四民倡其罪尤甚約

子試士時俾有司覈報苟有遺糧則停試俟其既完得從有司具狀補

錄里社不肖驟聞是令不能無怨而方伯弗為之動已而學使行部至

甯聞方伯所行善之且令行之通省是歲浙人之課為天下最先是

世宗已嘉浙人自新之速及聞樂於輸將大喜遂准復科眾至是咸喻

方伯之大有造于浙也比方伯卒鄞人全祖望述其事並為之誄其詞曰西涼之域茂陵所開晉十六國繼翦蒿萊歷唐宋元頗稱乏才運際

中天乃起其衰巽使君破荒而出如鍊石手以補天闕花磚綾被三館矜式洵歷方面樹藩秉臬彼名與位有如飄蓬惟茲令聞可以無窮吾家粉社桐鄉之東甘棠蔽芾我思召公祖望浙之聞人也於時流鮮所屈服而獨心折方伯若此可知方伯之所為治浙與浙人之感方伯也深矣又修復南宋六陵祠祀義士唐玉潛林白石外旁及王修竹鄭宗仁謝皋父羅誥且議毀楊榿真珈泰甯寺而濬之其發潛誅奸修廢舉墜大抵類此然其善政率皆就湮挹奎采錄所聞著之於篇不敢摭拾無稽之言恐誣方伯也子為璘舉人孫備進士

高 穎 孫 高

嗚呼余同年范山唐公既歿之十有五年其季弟菘村君任浙江布政司事余以事至君幕接見驩心屬為公作墓誌命其孤司衡等具狀再拜以請固辭不獲余惟庚子之役余與公同舉於鄉出景州先生門越明年多至大官公亦回翔卿貳敷歷中外勤於王事以歿人事倏忽不堪把玩如此而余乃以未死之身流涕而誌公之墓可慨也夫按狀公諱繼祖字序皇范山其號先世為高郵人明代再遷江都遂占籍焉高祖諱某歲貢生開化縣令會祖某鴻臚寺丞祖某名諸生本生祖某歲

碑傳八十一

五

貢生知廣東靈山縣事公之考諱詩康熙甲戌歲貢生注選儒學訓導以公貴贈翰林檢討生公兄弟六人公行居三公由庶吉士充武英殿

侍直官與修子史精華等書癸卯世宗憲皇帝登極覃恩贈公父如其官時次兄庶常紹祖歸里已數年至是以

恩詔起用甲辰同散館兄紹祖授編修公授檢討兄弟並舉翰苑時人榮之乙巳轉禮部儀制司是秋宗伯疏薦授浙江道御史甫一月都御史沈公薦掌河南道明年春奉

旨稽查八旗虧空五月巡視西城未數月升工科都給事中仍帶河南道御史時

上患南漕淹緩命公貳御史留公往淮安巡視已酉五月後復奉旨往湖南審察案件仍著巡察湖南湖北等處庚戌十月補授通政司右參議辛亥仲春於途次得

旨授鴻臚寺卿公以四月抄抵京師謝恩有中書官傳

旨以本銜署理河南按察司使事攝篆四月復改授湖北以十月抵武昌受事明年八月監文闈試中勞瘁邁下利勢漸劇具摺奏聞奉

旨回籍調理在家踰年而卒爲雍正癸丑十一月初六日年六十三公以宿學負重望晚而獲遇漸以文章報國既踐外任遂精心吏事幹練強敏所至以才能著名其查八旗虧空也向例旗員侵刑法皆無赦而家已窮空羈案至二三十年不結公爲開除核減奏請豁免案遂結巡視西城狃民聚居牛角一帶頑獷兇恣官司莫敢誰何公一斷以法榜示約禁後有犯卽建治終公之任莫敢肆廷議建倉東便門外地多家墓祠宇發掘拆毀甚眾公上陳諸不便狀且云建非其地請停工別選善地墓已發者復掩埋所毀之祠將入官市宅改建得

旨允行其巡視淮漕也向日漕船遲緩水手沿途生事甚至劫盜慮事發則遣行別縣恃官糧爲護符不可究結而京師坐苦食不繼公以二月疾馳至淮時督漕爲張公大有慮公至法有變更弁役益憂懼公至一鎮以安靜弁役無所訶譴但選幹練隸日夜催趲違者法無赦人情既安並思奮力遂於四月盡抵通嗣後遂爲例公暇日得漕務利病七事上之交部議行湖南與中丞趙公審承順激變一案諸苗帖服一境遂安湖南捕役與盜通故多盜公奏請捕役爲盜罪加倍奉旨刊入七年新例盜少革公在湖南半年行皆自裹糧有餽觴酒豆肉

輿傳八十二

六

必揮斥故令行禁止湖北藩臬兩司相構隙屬吏申詳多遲迴觀望甚至黨同伐異公奏請敕下督撫令兩司解釋和衷共濟奉

旨著督撫省問並令公三面對質自庚戌十月至明年二月質問事竣公再遷官公在兩湖久熟知民吏情僞故自河南按察使改授湖北也公喜自以爲得以上報

聖恩楚俗號刁健患在黠吏與姦豪通伺官長喜怒潛授意旨故訟號難治公至閉諸胥職要者一室中勒不與外通健者失所援認爲衰減公晨起躬閱訟課理事常至夜分鞫獄深細窮極幽深明允之聲大著監利縣有四子萬氏名之女父母早亡遺一弟數齡而弱之母力保持之從兄之璋利其有知之女不可奪與僕謀以污穢事誣之極刑拷掠而投其屍於河縣令率擬招解公爲白其冤而寘之璋與僕於法請督撫旌表之母令有司致祭鍾祥令某以增耗費致武生張東周等集眾武當山謀爲變橋忽圯壓溺死數百人時以縣令始禍欲從重擬罪公與摺奏縣令寘重法不爲枉但楚風刁惡今以聚眾謀變而朝廷爲殺一縣令恐愚民無知效尤漸不可長請俟此案歸結後揭參奉殊批准行後乃以計典劾罷之嗚呼自

世宗憲皇帝以文法吏事爲治內外大僚俱凜凜救過不暇公一意展舒所奏請無不允行率朝報夕可中外知上欲大用公當公之奉命巡察湖南也

賜西洋奏摺匣四而諭云我於各省督撫做官好者賜摺匣汝宜小心做官及辛亥復命恭繳命仍帶往新任蓋

憲皇帝之知公深矣而卒以未疾解任踰年而卒不竟其用此可爲太息者也昆弟六人惟伯兄顯祖以諸生不仕卒餘五人皆服官少時並有雋才稟承家學不從他師名噪諸生中而公最晚達戊子己丑仲兄紹祖聯登進士列館選官終湖州府知府弟繹祖辛卯舉入官至開封府同知卒次續祖由賢良方正今爲直隸西路同知季綏祖丁酉舉人卽藩使君也藩使君有大才今方嚮用未艾而仲兄年八十優游家居由是而公昆弟六人存者僅三人耳公之以疾入奏也未至京師復有調任江西之命時病已愈明年始有回籍調理之旨公遂買舟歸維念

賜匣未繳猶應一叩闕廷嘗於平山堂饒楊太史冠蓋雲集公偶拈韻得家字口占一律結句云遂知輦上客相待滿京華公蓋有意復出而

神傳八十二

天卒尼之命也夫公與仲兄俱以詩古文辭著稱而公尤長於詩律精工深穩闔唐人之奧而刻意精進不欲遽壽棗梨歿後文存二百首詩近千篇俱散亂笥中惟義山詩文對釋梓行於世仕宦近十四年家無財子姓猶仰食藩使君嗚呼公之生平可知已公元配火氏繼配倪氏俱封淑人子三人司衡衡時衡姻戚子姓具狀中不悉書家孝友行應銘法乃敘而銘之銘曰

邗江之水天鎖鑰秀氣鬱蟠傑人作公家兄弟奮鵬鶚晚登皇路後灼爍歷職內外儼有恪年止中壽歸冥漠一生制行何磊落我作銘詞無愧作

陝西按察使司按察使何君師儉墓誌銘 李敏

君諱師儉字桐叔別字素堂姓何氏浙江山陰人六世祖諱某與子某先後爲尚書子孫世有仕宦君曾祖諱某有聲太學以子貴贈御史祖諱某貢生遭時鼎革不仕學者稱靖菴先生亦以子貴贈御史今以君遇覃恩贈通議大夫考諱某德安府同知亦以君貴贈官階如靖菴公君少穎異考卒於德安君年甫十一哀禮如成人稍長游蘭亭感右軍虛談廢務語慨然有經世之志爲時文師陳大士先生試順天時余嘗

見其文咨賞之然卒不售康熙六十年循例選任兵部職方司員外郎
司多弊立清之大學士孫公柱白公潢方爲尙書倚任如左右手雍正
元年盧公詢爲尙書欲以精勤見長督所屬嚴刻令司員才者徇直辦
事君才名尤著嘗數月不得歸七月余來爲侍郎閱君獨賢勞將薦君
十月君遷廣西按察司僉事分巡右江道余適以知武舉入闈尙書孫
公等遂特奏留君一年

世宗憲皇帝亦稔君才能特許以陞銜留任仍加一級兼賜人獲貂皮
人以爲榮先是君嘗以執法卻重賄忤人至是其人因誣君避瘴也
故欲留部余昌言今部曹不能名一錢才者尤勞瘁苟得郡爭趨之矧
監司乃規避耶要人語乃塞明年余以巡撫廣西去部君留市期

世宗將陞用君尙書等復請留君一年又請加按察司副使銜並奉
俞旨尋以分別錄用功加人員議疏稱

旨特加二級是時本司奏彙多出君手佗司事難治者亦時時委君勞
瘁至不可支然君名亦由是冠六曹上結

主知矣三年冬遷江南按察司副使管理驛鹽道瀕行恭請
聖訓獎君才勉君操守反覆千餘言奉賜貂皮端硯食物許用密劄

輿傳八十二

八

言事尋調補廣東糧驛道四年至粵值歲大祲民輸糧不前而兵米又
急君察得存留米五萬石卽用以給餉飭所屬緩征或疑專擅將得咎
君曰俟請而後行民已苦於箠楚矣總督孔某兼理鹽法聞君才名委
君署鹽法道事時督撫不和欲引爲己助也巡撫楊某疑君爲孔黨因
委令買銅時戶工二部錢法壞分令八省買銅承其事者多賄累楊欲
以此困君兼散孔黨不知君實中立無黨也明年楊以丁憂還京奉
旨任守制陞辭時

世宗出總督封事示楊皆劾楊者并劾君爲楊黨楊乃知君公正至粵
歎服卽委君署按察使事孔又疑君背已而暱楊也六年楊病沒孔遂
以違禁開礦侵蝕銅價誣參君嚴禁而酷訊之蓋惠州有銅山民人私
采鑄向時買銅者多取資焉孔嘗傲君買以助不足君嫌其爲私采陽
許之實未買明年署巡撫傅某來會鞫得其情併於案牘中得孔檄事
遂白疏入奉

旨赴部引見君免冠謝罪

世宗溫諭爾爾冠汝無罪朕知之矣又委曲訓誨移晷君乃頓首出次日
卽

命往陝西於甘涼等辦理軍需地方以道府酌用八年二月至涼州川陝總督查公即委君署涼莊道君在兵部時素留心兵事三邊形勢阨塞戰守機宜兵多寡將勇怯餉芻緩急每公庭會議指畫如素習查公深契之故兩江總督范公率師過涼奉檄至肅州支餉而自涼至肅途尚遙宿春已竭君謂軍務有變通原檄豈可固執即以涼所蓄給之師乃不饑一日羽書飛馳過涼者數四莫知所以君策必調取生兵也時餉以待已而果然肅州大軍將進勦飛檄至涼令截取官民羸馬送肅載軍裝違者以軍法論官民咸張皇君謂道上官與商無不赴肅者官皆有事於軍前貨皆軍前所必用若官頓于途貨棄于地非軍前所宜也進勦尚未定日不如令其至肅釋所載而後役焉彼將焉往軍前得人與貨吾亦省芻蕘解送之煩不兩利乎檄雖嚴吾自當之官商皆安事亦無誤君在粵獄時鬱怒傷目適準噶爾使人過涼委君押送力疾出邊風霜侵刺右目遂失明而督撫大吏咸欲得君甘肅巡撫以臨洮道薦總督查公又奏君調補西安驛傳道

上從查所請遂還西安時方旱下車而兩民歸德於君先是大學士鄂公經略西師見秦早策荒政以陝西商州龍駒等地界連湖廣隋唐漕

碑傳八十二

九

運故道在焉秦饑可泛楚粟以濟還朝入告而兵部尚書史公方總理陝撫事亦以是請得

旨允行詔運楚米十萬石赴秦史公委君董其役運至四萬石值大雨時行中途有須越山者溪漲病涉馬羸又鮮少商於一帶既無頓積之所水次隘運艘亦不前官民交困君以秦中秋穀將登可無庸楚米遂檄止後運徐陳情於史公公喜據文奏罷其役秦亦不饑君任事勇不顧一己利害類如此軍前馬缺檄取驛馬君言於史公置郵傳命如人身血脈不能一日廢請覆以不可行事竟寢十一年冬陞按察使數平反疑獄人稱神明吏有故出入罪者必按如法雖貴勢賢親不徇縱也君既有目疾晝夜治官書不懈于是左目亦昏十三年五月又得吐疾即以病乞休督撫並慰留八月

世宗龍馭上賓君感知遇深慟絕左目竟廢

今上登極詔至君念固苦令吏誦案牘諦聽得邀赦者立出之而後請奏二閱月而畢力請歸督撫猶慰留君乃自繕劄奏巡撫知之亦繼奏乃得歸歸二年而卒乾隆三年二月十一日也距生年春秋六十有五嗚呼君其已矣君績學工時文不及取科第負經世之略不竟所蘊

然觀君所已施者則君所未施者可以知已時文不足道也生平孝友忠信與人交費千金無德色至於所許可甚慎奉

詔薦賢惟舉南昌諸生裘思芹卒爲循吏君子稱焉原配胡氏刑部尚書貞巖公女前卒繼配謝氏封淑人子二人長筠三品廕生次鏡太學生女四人婿山丹縣知縣祈安期己丑進士臨淄縣知縣孫金堅太學生沈世瑚諸生玉濤也孫男六人女二人余與君同在兵部知君深又嘗令其從弟懋承從子經業問學於子經業君嘗子之今任廬州府通判君卒後二月余奉

命祭告夏禹王陵至山陰君之子來請銘余諾之然余已乞假順道省親晝夜行未暇以爲歸值太夫人八故憂居廢業而君之子必欲得余銘文踰十有八月而未葬也今歲十二月復來請遂爲敘之某年月日君葬期也某山之原君葬所也銘曰

越維霸國多幹濟才何屬郡望八座斗魁簪組世昌施于雲來科名中替消與息偕君獨奮興以紹以衣邦政中理國憲外持未究厥藏亦光乃施保世滋大爲先之開稽山之陰蘭渚之涯君安於茲茲城孔嘉勒辭貞珉永無有壞

碑傳八十二

十代某

通奉大夫廣東布政使司刁公承祖墓誌銘 乾隆己未秋七月十三日方伯刁公以疾卒于位公之子將奉喪北歸杖而泣拜曰不孝孤不天以鍾禍于我先大夫今將歸葬于鄉厥有日矣惟是墓中之刻以先大夫之辱寮友也敢託以不朽蓋公之來蕃于粵在戊午之春同官幾二載余雖無文誼不得辭謹按公諱承祖字忠武康熙己卯舉人乙未成進士始選陝之扶風

世宗憲皇帝識公才特改江南上元縣遂以吏績最擢守太平調鳳陽遷湖南糧驛道卽拜湖北按察使調江蘇旋晉河南布政使移浙江復移江西

今皇帝御極之二年迺蒞廣東終今官此公歷仕之大凡也公在上元民有訟令自拘繫以聽鞠縣倉大樹有憑爲崇民競走其下公伐之姪祀遂絕上元爲都會首邑號最劇難治而公日夜治文書講求利弊苗藪而髮櫛之豪猾屏息其在太平兼視蕪湖權商民便之在鳳陽會一權泗州再權鳳廬道縮三印專一路而庶事就理湖南治長沙歲漕京師阻以洞庭長江每後期公至立約束信法禁武夫悍卒無不踧踏奉公命者其在江蘇頗久在湖北未數月在浙僅二十日耳欲有所振刷

興革而席不煖輒去然至今民謳思之其人可知也癸丑河決陳留將鬻開封諸使自出督塞之有欲坐其罪于濱河守令者公抗言曰治河有專司釋彼罪此恐異日河上無任事人矣乃止其持論切直棘棘不阿類如此在江西知留務甫兩月而所部翕然吏以無事其來藩于粵也粵山多田少歲偶歉市直踊貴公恐常平不足給建議請發帑金十萬增糴倉穀民仰以濟濱海之地潮壅沙成田多為豪強大駟侵占其弊百出窮叱往往中其害訟牒如山歷任不能釐正公選廉吏履畝親丈之不數月而清瓊南黎人不識文字輕犯法公檄守令設館選士教以誦習詩書吏之來見者反覆訓誡不少假顏色皆進而懼退而感久乃漸致于理也符檄文告之下諸州揭諸鄉亭者莫不觀聽聳動思自克于善以副公意蓋公外嚴而中恕待人以不欺故所致廉廩有聲如是公先世自明永樂初由興州始遷祁州遂為直隸人選貢諱克俊者是為會王父出督學左忠烈公之門振虞勸分鄉里德之為立祠私諡貞惠先生舉人諱包者是為王父鏞戶著書講學河北東林諸賢所謂潛室先生者也私諡文孝耐無錫道南祠諸生諱再濂者是為公考內行修謹私諡宣定先生王父及公考皆以公貴贈如其官王母李氏

碑傳八十一

十一

于氏許氏四娶亦李氏皆贈夫人公之妣曰杜氏贈夫人山西黎城知縣應甲之女生四子公其次也配張氏封夫人同里諸生勃然之女婦道母教稱于鄉黨子四錄甲午副榜鈞太學生安仁早卒錦戊午舉人出為公弟興祖後孫三世昌乙卯舉人世瞻太學生世暉孫女八曾孫女三公生康熙壬子閏七月初二日距其卒時春秋六十有八公性孝友篤于行義教猶子如己子先後登鄉書者四人廉介而儉雖踐顯貴階列二品而被服儒素旁無媵侍非賓燕不設杯杓私宅之內齋廚蕭然士大夫僅見者也墓在州之某鄉某原其歸也將卜日以窆銘曰豫章之材厥生厚地刁氏之德積累有自公起履之造家而貴既熾既昌後則孔臧閻辭幽堂其久有光

常鎮道馬君維翰傳

系調元

君諱維翰字墨麟號侶僊姓馬氏海鹽之俯浦人生而器識宏達穎悟超常兒九歲能詩文康熙庚子舉於鄉次年成進士諸公爭邀致之不往雍正甲辰

特選為吏部稽勳司主事轉員外郎試陝西道御史掌河南京畿道陟工科給事中監督倉場出四川清丈田畝先川南次川東轉戶科掌印

留蒞建昌道上官構之君通揭部科解職赴部質復元官乾隆丁巳起

江南常鎮道丁外艱得中風疾庚申五月四日卒於家年四十八

憲廟注意人才命柄臣選諸進士之賢能者君眇小丈夫不得與氣憤

直前曰今日選賢能耶賢能安從見選魁梧狀貌耶國家事非仗此辦

願選意何居柄臣奇之選留吏部甫視事發晉姦子杖故事馭銓曹胥

節體貌犯重付法司輕革黜不杖也君杖之銓政肅清攝他司益整暇

所至有聲其清丈川南東也糧浮於田必請減相要害改黎州千戶所

爲清溪縣兌占桑昂邦寺部跳梁焚掠及烏蒙我師會勦君駐打箭爐

供糗糧芻茭絡繹不匱雪山積鑿徑纜通匹馬苦寒裂膚與廝養同

飲食辛苦捐俸佐軍需論事悉中機宜西夷平涼山數百里地震疾馳

勦災條上之散賑得實建昌人感之兩泣三渡水摩步蠻殲厥夫方進

勦君力陳營兵不輯開各廠病變狀遂得請罷廠撤兵撫各番誅止其

魁全活無算在蜀七年意不阿上官旣被搆赴部質時親王總部事極

威重粹免冠君以兩手按所著冠抗聲曰奉

旨不免冠譙問故則又抗聲曰

旨解職非革職也乃趣具疏請革職會

憲廟賓天事旋白復原官君遇事勇無所詘居恆沖和坦易雅近情事

親孝迎養於蜀先意承志贈大父封父如其官祿分族戚視友如性命

好獎士類居常鎮品目江南人文文教風動所著詩古文精悍如其人

入蜀後所詣益進同時浙西以壇坫自矜許者舉莫之及已刻詩十二

卷未刻詩十卷古文十卷舊雨集二卷藏於家舊雨集者君哀其平生

所交友之作也

彘調元曰曩予讀君論勦撫事宜諸篇贊畫如神筆挺挺踵史漢以謂

經濟文章兩不可漸減頃君之子某持狀乞予傳君子遊山久乃歸某

又從所親南去無從索其家藏稟古史傳體類援述人書疏以見其平

生子欲述君文而末由也姑就狀及予聞見傳之君文自爛爛如日月

子獨以君之忠直才略不得竟爲可惋惜也予請急歸君書來賀予以

亂齟之身乃今得免玉碎而君不久即下世矣悲夫

四川布政使閻公堯熙傳劉紹放
公姓閻氏名堯熙字涑陽世籍山西太原徙居夏邑昆弟三皆弟子員
公其仲也伯叔以家貧舍儒就商公獨守一經日不再食不變康熙丙
子舉於鄉丙戌捷南宮越七歲令藁城藁邑濱漳沱常以秋浸溢公竭

賞築隄建木椿數千以捍其衝念易朽夾岸種柳堤固水不爲患至今
春夏之交鬱然成陰學士歌頌之治葉十一年移南宮地要劇前令多
註誤暑常見怪扁鎖室其旁公曰邪正之分在吾方寸方寸邪則曖昧
昏耗鬼賊由生方寸正則青天白日豈逢不若乎遂培鎖擴門就榻其
中卒亦無怪未幾遷晉州牧州瀕河河失故道蕩析民居公請設法安
集免河患者詣公謝扶攜老稚相屬於道公曰

聖恩我何與令望闕拜復念遠來人給百錢以資裹糧頃之散錢十萬
民益感激泣下曰眞父母也會怡親王奉使過晉耳熟公名奏循良第
一除守青州時嘉興守缺

上以嘉難於青改守嘉嘉健訟豪猾陰把持良懦受魚肉數十年不決
民赴守訟批下縣或不理狡黠者益無忌獄繁興公始至日判狀三百
無不受理者民固異之比逮對簿自請息者二百餘庭折數十各得其
情去積年訴牒一空豪猾股栗竟歲不一陳詞嘉人張某有姦如山皆
欲甘心然嘆之莫敢發公廉得實杖殺之一紹興老嫗糲糲來指屍而
罵並數其惡萬端初張暴於鄉或諫阻張怒曰我何畏只畏閻王耳至
是死眾以爲識稱快郡殷於賦正供漕糧其目紛紛里胥因緣爲姦民

碑傳八十二

完如額官不知民亦不自知追呼無虛日而賦終缺官考下第以去公
巡行清理民始知額歲完無遺屬邑海鹽潮汐擊塘工不就制府李公
衛聽浮言欲開引河禦潮不知滴水入內河田畝皆傷非特壞廬舍靡
帑金已也已入奏公微聞知力白其狀得不行營弁緝私鹽賣其梟妾
持他人抵罪公言其誣制府惑於弁弗聽公三請制府怒賓儕咎公公
曰我不言是輕民命護一官也復與制府庭爭制府不能屈乃自勘釋
獄愈賢公累遷湖北臬司臬司爲刑名之匯前司深文巧詆所屬重足
而立目其堂曰閻羅殿公務生全不苛小人稱之曰佛再遷四川布政
使蜀俗父子異產伯叔兄弟不相愛婦多外遇夫知之不怪或亡得之
亦不逐公曰禮義廉恥國之四維亡此何以治教化之行始學校乎因
勸俸廣學舍增膏火延善士爲山長歲時召見諸生與之抗禮士多榮
之負笈滿成都成都當康熙時兵燹未久人稀穀賤故滿兵願得銀雍
正以後生聚多穀貴又願得穀或徇其意請於朝令民受銀購穀給兵
事下前司聽囑如議上漢兵亦欲做行公不可督兵爭之公曰滿兵例
不出其城字畫言語不與漢同代購猶爲有辭漢兵募自民間且其父
子兄弟皆民也奚不自購而煩代購乎督兵語塞不能奪又議增滿兵

滿兵向在京師雍正八年西域用兵分駐涼州及兵罷涼地小不能容謀徙成都公以提督都統例不並駐惟蜀俱在一城民已不堪忍復增之以重民困平議上制府心是之而未敢堅持也必欲增當別城以居舊有城制容三千人駐千五百餘地占越歲久莫能知旗長知之故不言令遷民以築既卜地民惶懼號訴撫軍召公與計公得舊城圖籍指示撫軍曰城甚廣居者半增亦半適如其制安得他築以重擾民請爭之乃清侵地以居來者民得安堵公爲人質直面折不能容人之過賢則善遇之不賢直斥之雖大府不少假然宅衷光大語必至誠初交或怪伉厲久與處無不斂手推服其所擘畫尤動中機宜乾隆三年川東米貴州邑借帑購米平糶遠賈但聞價昂未聞官糶連艘雲集一夕賤州邑虧帑自數百至數千責償而成都官糶贏金二千例買穀貯社倉公曰官有虧有贏贏不受利虧顧受害乎請破例以贏補虧得解公之量足以任事而才足以濟之蓋如此年六十九卒於乾隆七年九月十三日聞者莫不流涕子秉隨秉晉秉益秉升

碑傳八十二

十四

九畹子曰成都太守王公時翔爲予言公初下車聞錢貴書定之既榜示王公謁公曰錢米隨時繩以官則有錢者匿不出售買錢者指官相強市廛從此多事矣公欣然納之立毀榜其勇於從善非有道者能之乎及歿予往哭之僭眾致賻公子稱公命不受謀爲贖餽馬送之行亦不受嗟乎見利忘義人情類然安有餽之有辭受之有名而卒不少動者耶一事而公之賢子之肖俱見矣

觀察黃公世發傳

李琳

黃公名世發字成憲貴州印江縣人中丙子科鄉舉選肅甯令性慈祥耐勤苦於民財一無所取惟錢糧舊例加一二作耗銀公亦收之而不自用肅密舊雜派重畝田派至銀三四錢公悉除之凡縣有役事或上憲別派出卽以耗銀應之以故在肅數載民並不知有所爲雜派者一日河開府檄修府城公親齎餼糧出銀錢雇工不日竣事並不擾之社甲也好樹藝闢護城廢地種稻作水車起池水灌之苦不足夜夢一神指曰此有水乃護堤也往下掘之果得水周遭十數武以驟驟曳水車灌田水乃足雇長工六七人種稻外澆菜飼猪羊糶米自養綠堤上下皆植樹數年積至千餘株叢陰鬱然又闢武垣城地亦植樹合計約萬株雍正三年縣水災督撫差官來查公不能得其意効公去官肅盡士民號哭挽留聞于朝

朝廷復公官加四品服俸已又授按察使直隸營田觀察使令公巡行
直省勸民農桑爲善並察水利可興者公自在肅寧好教民生計出門
或乘馬或肩輿左右顧諟諱屬民以力田栽樹積糞紡織孝親敬長教
子睦鄰民初聽之甚服久而以爲絮語亦不之遵也又好講聖賢名理
在肅甯定三六九日聚諸生講書會文鄰封至者多有久而人亦玩之
年七十餘每日雞鳴卽起秉燭批閱文書時文晝焦勞造事無頃刻暇
琛常進言曰君子平其政行闢人可也經猷自有綱要細碎亦可少捐

也公愀然曰吾政言政哉吾何德與才而

朝廷委之任吾惟知傭工免忝愧耳並耕而食小人事非所避也至是
每至一處輒登高坐大聲宣諭士民徹日不倦士民多感與者卒之易
州水峪相一地開水田經營年餘未就而卒年七十六

李瑛曰黃觀察今之廉吏哉率其本質一無雕飾者也孔子稱善人曰
不踐迹而自善若黃觀察者非耶

通議大夫江南布政使陳公德榮墓誌銘

方苞

公姓陳氏先世浙江秀水人明永樂初遷安州五世祖始爲儒官遂世
其業祖若父皆舉乙科教授鄉邑連州比郡秀傑之士多從遊公成童

補博士弟子堯然出儕輩甫弱冠卽佐父爲諸弟師學使者課試歷其

十五

事者必公兄弟也而公自視缺然陰與博野尹元孚思古處務檢身制

下卽充武英殿纂修時滄洲陳公掌殿中修書事常語余後進有守有
爲者以公爲首故公詣余一見如舊識初授湖北枝江令鄰省大府卽
思得公守巖州劇郡旣典郡卽思得公爲監司故論薦者如爭其以黔
西州服闋引見

世宗憲皇帝卽命赴貴陽以牧守補用其守大定以江西巡撫薦遂命

補道府皆前此所罕見也公任官二十餘年皆在西南而勳績尤著於

滇黔其爲政急民之病如其私而務以殖其衣食爲本始令枝江修百

里洲隄除解餉入川雜派攝饒九道剗去潯陽大孤兩關錮弊辨誣獄

出無辜者七八未數月經略張公以貴州按察使保奏方是時羣苗交

煽軍旅四出古州姑盧朱洪文諸叛叛以爲非公莫定也公至出入重

輕咸稱其情眾心始安逾年春攝布政使黔地多山硯少穀土兵餉半

移調於鄰省民尤貧瘠公奏給工本築壩堰引山泉以治水田導以含

洩涉揭之法貴筑貴陽開州威甯餘慶施秉開不數年報墾升科者三

萬六千餘畝課種桑募蠶師教蠶出署內所登繭於大興寺繡絲織作
使艷其利開野蠶山場百餘所比戶機杼聲相聞又以其閒大修城郭
廟壇學舍廣置栖流所以收行旅之病者益囚食方冬寒恤老疾羸孤
之無衣者親課諸生開以立志爲己之學立義學二十四於苗疆蓋惟
公廣而才足以達之故於艱難倥傯中庶政並興而曲得其次序也其
尤爲遠近所傳述者公始至貴陽委署威寧府踰年威寧改州大定改
府會烏蒙土司謀叛東川鎮雄附之威甯爲夷裸出入要縮地仍命公
馳赴威甯督州牧完守公至城西陴積舉步可踰乃聚民閒米桶實土
石層累丈餘然後比次築築墉堞屹然羣夷縱火牛街鎮去城三十餘
里火光燭天公言笑自如日夜爲守戰計賊不敢逼會哈元生兵至賊
敗時鄂少保總制滇黔公其所舉任也常以此自喜知人之明張經略
引公自助亦職此之由而余與尹爭平生重公則在志行之不苟威
甯危急公慮賊兵趨大理屬州牧陳嘉會分守大理執其手曰吾死於
此分也但遺老母憂齋志窮泉矣及公陳桌於黔苗疆初定方輿屯以
蹙扼之將吏多欲以刻急見其能謂此異類期絕不足惜也丁巳正月
望省城大火公入見張經略曰天意如此當設誠修省雖羣苗亦人類

碑傳八十二

十六

也張公大爲感動以申戒承事者公之一於義理而不雜以世情如此
昔滄州政績惟著於郡縣與攝江蘇方伯時及踐大府河決武陟以死
勤事而功不成海內惜之公之才識與滄州相近而遭遇亦略同自爲
三司天下皆爲大府近十年矣大府多舉以自代而竟終於此然滄州
攝監司日淺又不若公之久於其任而實德及人良法垂於後世然則
在公亦可以無恨矣公自黔調移安徽未一年會徐鳳水災民流於金
陵地非公治也而竭俸賜編芻蓋布席以栖災黎重建陽明書院以
實學開羣士其卒也官吏士民皆爲嗚呼生平孝親友弟睦嫻任恤仁
於故舊僚友不可備書書其志事之卓卓者公諱德榮字廷彥號密山
康熙辛卯科舉人誥授通議大夫生於康熙二十八年正月十六日卒
於乾隆十二年八月二十七日年五十有九會祖諱所聞歲貢生祖諱
澎順治庚子舉人父諱鶴齡康熙甲子舉人以公及仲弟德華累贈通
奉大夫會祖妣潘氏姜氏張氏祖妣王氏吳氏妣鹿氏並贈太夫人娶
辛氏浙江分水縣令禹奕女誥封淑人子四人長策乾隆丙辰進士江
南宜興縣知縣次筠雍正乙卯舉人候補內閣中書次筌乾隆甲子舉
人皆辛夫人出次籓側室王氏出女四人孫四人以某年月日葬於某

鄉某原銘曰

古賢之生各有志事雖過於時難滿其器與其遇隆而施則匱孰若中
閔用有未致公如金玉韞則有輝爭先欲觀眾心所希蹇然當官萬然
近人雨膏霽被物象皆新事至立剖光融如燧表裏洞然盡祛姦伏中
經畏塗進退維谷國爾忘身如行平陸誰謂文儒細於武守持危濟變
左宜右有信道不移行身無倚諤謬危言以報知己獲上以誠師中有
喜異類同仁德施無比海隅蒼生望公秉鉞中朝良士佇盼北闕謂承
天休如枹與鼓年未及耆忽焉終古愛已遺民迹當見史無為公悲公
長不死

中大夫直隸長蘆都轉鹽運使蔣公林墓誌銘 陳黃中

世宗皇帝御宇十有三年勵精圖治勤求民瘼尤重牧守親民之吏為
官擇人立賢無方至輟文學侍從之臣付以專城之寄者不可一二數
諸臣亦並能祇順德意奉宣條教故一時多良二千石治化洽和貪墨
屏迹庶幾所謂吏稱其職民安其業者以余所見全州蔣公其尤可稱
述者也公諱林字元楚世為州著姓曾祖彥賓明州學生祖景濬贈中
大夫父時昂封中大夫曾祖妣唐氏祖妣熊氏封淑人前妣趙氏封淑
人母趙氏封太淑人公少警敏年二十一領鄉薦舉康熙五十四年進
士選庶吉士授翰林院檢討入直

南書房十年不遷泊如也雍正初大將軍羹堯方貴寵呼喻能為人
禍福其幕府翰林數人皆請於朝以往公門生汪德容與焉羹堯重公
名亦欲請之德容固勸公往公遽請急歸省人皆指為迂未幾羹堯敗
在幕下者多汙黨籍人始服公先見頃之還朝調戶部郎怡賢親王方
總戶部事一日檢籍有三稅銀目顧問諸司皆左右視莫能對公進曰
在昔淮南河漕鹽三院解皆故民田後田為官解而賦未除故以關稅
之不及三釐者半抵田賦半供吏祿有故籍在可覆視也王顧諸司曰
官不當如是耶會有齟齬公者時尚書為蔣文肅公每對王論諸司賢
否必言郎曹中無如蔣某賢者忌者迄不得行王益器公才遂以道府
薦

召見稱旨命往福建以知府用至即為延平守未匝月調邵武精強幹
敏過于老吏以坐倉精失察吏議解官有

詔引見命往浙江仍補前官至則攝守杭州明年移嚴州既兼攝金華
杭二守事前後歷守三郡剽煩鎮靜因俗為治事上官不激不阿臨事

有執守在杭日值織造隆昇建議塞海門尖山別開河以固海塘公移書極言不可有曰公能使海不潮則役可興否則勞民傷財萬無成理又上書督撫極爭俱弗省十二年三月二十五日漏下二鼓牒下案杭夫萬五千人合旁郡無慮數萬人期三日集海上公力爭曰田桑方棘而期會迫萬一勿戢將若何必不得已獨不能俟蠶功畢耶昇怒督愈急且以抗

制脅公乃以四月送役往又面詰昇以尖山必不可塞狀昇益怒因留公督役以困之且慮有變卽誘以罪公冒雨撫循泥深沒脛役人感公誠咸盡力昇又虐使眾役動以捶撻立威棄鋤而諱者數矣當是時徵公事幾殆俄役迄無成昇竟得罪去杭郡大獄屢起公所訊鞫平反爲多有欲以周內爲功者側目視公弗顧也治嚴以清淨爲化訟衰獄空歲飢檄屬邑開廩振貸不俟報可修舉荒政全活無算娶俗囂悍無賴子縱橫里閭問公治尙寬恣睢自如公取尤無良者痛治之遂不敢犯今上卽位以公治最有聞召赴闕入對卽日除長蘆運使洗手奉公廉隅凜凜商故有公使錢異時院司歲各費數萬緡公以身率儉歲費不及百緡院亦憚公歲取錢異時數之半然用是望公亦無以中也嘗再

碑傳八十二

六

護院事得闕征羨餘數千吏白故事當歸私橐公命留之庫不私一錢居四年以父母老請歸養

上覽奏顧謂近臣曰世乃有不願久爲長蘆運使者耶命籍其名始前其請明年丁父憂哀毀盡禮葬後日一至墓所哀至輒慟奉母居鄉八載足不跡城市與兄弟友愛尤篤待族黨皆有恩鄉人化其德有爲不善惟恐公知之性儉素旣貴布帷布衾及歸後黃冠草履往來阡陌聞出於坦誠人不議其矯也與人交有終始外和內介自號曰介亭此其志也公以乾隆十二年十二月十六日卒年五十四娶周氏封淑人子六良翊乾隆十九年進士知萬全縣良驥乾隆十六年進士翰林院編修良驥乾隆庚午舉人良駟良駟良驥良驥良駟皆後公卒女六諸生謝璠曹石瀾太學生謝之伯趙汝銘曹文唐啟瑜其壻也孫六善長善承善士善交善啟小同孫女五惟公弱冠登朝回翔中外歷二十餘年甫踰強任卽掛冠侍養難進易退卓有古人風烈用世之才又未獲盡展故其吏跡見於治郡爲多余嘗踰仙霞入閩坐篋輿中知輿人嚴產也因詢以前後州守孰賢愀然曰惟十年前蔣使君愛民如子百姓無福好官豈可常得耶余爲嗟歎久之初余以乾隆三年客京師公屬掾

吏聘余入使署課其子故良翊良驥良驥皆從余遊其明年秋余辭歸省侍後三四年間往來南北又兩見公於天津酒酣耳熱公輒抵掌縱譚天下事兼論人才邪正及生平進退大慨其英風偉抱抑塞磊落至今猶想見其爲人而公不可作矣公卒後十二年良驥亦侍母里居走書踰三千里奉狀來請銘且曰非先生無可銘吾先大夫者然則余又何忍辭銘曰

大鵬絕雲斥鷃笑之駑馬戀棧驂駟載馳猗歟蔣公玉堂早登冷官寂寞冰山肯悲振職郎潛屢騰刻章出縮郡符政繼龔黃治劇撥煩見善者機眾人之母可慰渴饑繼處脂膏若將浼公歸拜高堂其樂融融人謂公才勇退曷爲詎知公心好爵莫縻粵嶺之高湘源之清起懦激頑公實豪英紗帽山陽公豈是藏毅魄睽睽浙水桐鄉我最其迹幸無媿辭萬世有攷其在於斯

湖北布政使朱公一畫墓誌銘王昶
湖北布政使朱公一畫素以政事才幹見稱於世公世家松江繼遷浙江之嘉善於松江百里而近故立身爲政之方余得備知其厓略及余以布政使雲南其子錦昌已爲騰越州知州曉暢邊事識見英敏人謂

碑傳八十二

十九

公之遺教也故知公行事益詳乾隆五十六年八月錦昌以書來京師曰某無似先公向在淺土而先母又不幸歿矣將奔喪歸而合葬焉敢以志慕之文爲請按狀公少敏慧年十五補縣學生卽以能文名浙右入太學名益著會準噶爾逆命用宗人府丞蔡公嵩薦召見賜金命往陝西軍前効用綬遠大將軍岳鍾琪使赴鄂爾多斯查檢輜糧器械刻期出師往返四旬而事畢將軍深異之自是任陝西之高陵麟游韓城臨潼縣事者四又任直隸之東明臨榆安肅者三任直隸霸州遵化知州者二由保定府陞清河道任山西直隸湖北布政使者三所至皆有政績人至今稱之在高陵也遇旱走五十里至驪山龍潭禱雨而立降歲以大熟麟游小邑戶不滿萬奉檄令民運糧力請得免其半在韓城歲災首出俸錢緡紳從之得銀九千兩赴河南羅米減價以糶周而復始銀盡乃止災不爲害其閒修學宮講鄉約嚴保甲社倉義學莫不舉行在臨潼清稅賦葺橫渠書院新之及署霸州拔井千餘以救亢旱爲保定府建版插以興水利高公斌蔣公炳皆推重焉而於斷疑獄捕劇盜尤長麟游有自經於質庫前者公往驗指尖黑兩手掌青舐之得銅氣公謂是博而負者訊之乃同賂人先與質庫詬嘗有

隙適死者頁多計無所出因愆之死以詐質庫於是得白眾驚爲神明
董商道經臨潼被竊盡失其貲時公在省道令歸而驗之公故以他事
辭怒將劾公則公已使捕役伺諸質庫賊偵事緩以其貨往伺者遂盡
獲之東明盜藪河南劉某爲之魁公廉捕役俞某能給以厚賞先獲其
黨殷二貫之使擒劉以自贖民患遂除其機警捷速類如此也公旣由
道升布政使感激

聖恩不次超擢地方利弊無不設誠而力行之山西山多田少南藉秦
豫北資歸化城餘粟商販不至民常食貴公念積貯以常平爲重晉省
倉穀例貯二百七十三萬有餘而是時缺額八十五萬三千四百餘石
向議以監生入穀補之穀貴收穀二年不及十之二請仿江南減二收
捐之例得

旨於是民踴躍捐輸倉儲始足值錢貴取庫存錢配放兵餉又發商領
賣錢是以流通歸化城在長城外民人命盜向令副將同知勘驗復由
朔平府審轉公謂勘驗一官承審又一官何以得實請卽令副將同知
審轉民始無枉縱株累者公骨格開張精神振奮擿發伏動中窺要
案牘如山窮日夜讞決不以繁瑣爲嫌在州縣久洞悉情弊發胥猾吏

神傳八十二

不敢上下其手獄有冤濫必請於主獄者全活往往至百十人性剛直
是非可否斷然不可易臨以上官環以大眾絕無依回洩忍由是忌者
思有以中之調湖北布政使旋以在山西用非其人被議落職得薄譴
籍家之日自祖遺田十二頃外無少增益然後益知公之廉罷官後主
潞安府起文書院山長又一年而卒卒以乾隆二十年六月二十七日
距生康熙四十一年閏六月十一日年五十有四公名一輩字健冲諱
某者高祖諱之榮者會祖也康熙丙子舉人諱岸登者其考也子三長
錫昌監生出爲兄後次卽錦昌次鋹昌又次弑昌孫二人某某配魏氏
明給事中贈太常寺卿大宗元孫女庶吉士學濂曾孫女仁孝儉恕讀
書能詩識大義後君二十四年而卒例封夫人以乾隆五十七年某月
某日葬於某原銘曰
督姦飭法以息嘔呻謂公明察孰知其仁口講指畫以悉利病謂公明
練孰知其正位不償德德不承年天實斯之俾昌後賢隆隆幽竈山盤
水繞借茲藿苒永綏厥光

碑傳集卷八十三目錄

乾隆朝監司上之上

四川松茂道劉先生而位傳 劉紹旂

安徽布政使司李公學裕墓誌銘 方苞

四川布政使司布政使李公如蘭墓誌銘 戴震

又四川布政使長芳李公家傳 盧文弨

通議大夫雲南按察使宋公壽圖墓誌銘 彭啟豐

參政田公震家傳 諸世器

山東布政使李公渭墓誌銘 沈起元

中憲大夫浙江分巡甯紹台道葉君士寬墓誌銘 彭啟豐

誥授奉政大夫掌山東道監察御史湖南鹽驛長寶道按察司副使謝

公濟世小傳 謝庭璜

范廷楷傳 諸城縣志

中憲大夫浙江海防兵備道莊君柱墓誌銘 彭啟豐

碑傳八十三目

公濟世小傳 謝庭璜 范廷楷傳 諸城縣志 中憲大夫浙江海防兵備道莊君柱墓誌銘 彭啟豐 中憲大夫浙江分巡甯紹台道葉君士寬墓誌銘 彭啟豐 參政田公震家傳 諸世器 通議大夫雲南按察使宋公壽圖墓誌銘 彭啟豐 又四川布政使長芳李公家傳 盧文弨 四川布政使司布政使李公如蘭墓誌銘 戴震 安徽布政使司李公學裕墓誌銘 方苞 乾隆朝監司上之上 碑傳集卷八十三目錄

乾隆朝監司上之上

劉紹成

四川松茂道劉先生而位傳劉紹成
 先生名而位字爾爵號希泉家山西平陽少穎異五歲喪母哀踊如成人七歲從其父學靜坐覃思有若老宿年三十三舉於鄉十年筮仕令河南安陽志在移易風俗民以事到官以禮誥誠頑梗者亦不苟法以制唯積誠感動相接如家人人亦愛之如父或爭產構訟十餘年官數易判久定兩造終相持不決先生至為剖解即斂手散其善化人多此類閱五年超擢泉州太守三年觀察興泉時艱於鹽商人居奇坐索高直民苦淡食率增價以市既而商鹽不足人不知所以第云龍斷聚而歐之交相惡而海舶私梟動逾千萬官往跡之輒持械殺傷羅織逮捕牽連數年不息先生倡議裁引革商歲額課稅歸竈完納如田戶完賦賦完任入轉運隨其所之則諸弊可革而國賦不乏大中丞趙公國麟心是之格於例不行未幾移疾歸卜居山中與妻猶子胡介峯講性命學先生服官歷八歲常以轉念二字作慎字王夫自謂有得至是念逐

碑傳八十三

事逐物無與本源乃復沈思力行歎曰道理無窮仁為之總私欲無窮己為之總是非之心即明德真路毋自欺三字乃吃緊工夫其學為益粹乾隆三年起官四川鹽茶道蜀井產鹽課由井納民甚便之雍正八年南部令曹某請設引招商增課數萬曹遷鹽茶道而蜀嶺自此壞商無餘貲運不足額民持錢不得鹽而井上滯積不售郡訶官此者佯為不知事發互相推卸先生力欲釐剔而大中丞畏之唯事苟安先生據理庭爭又不可奪乃深嫉之指為迂謬左遷松茂大中丞操進退柄權擬人主所屬無不望意旨競工諛悅先生獨強項居常秉禮不回遇事復以正告中丞既厭之同僚亦嫌不類復出為永甯道鬱鬱不得志所至無能施行與諸生講學而已卒于官年五十八先生甫知學即以聖賢為期學惟求心而功在克己嘗曰夫子自言生平開手便說志學其教人亦開口說學此正堯舜以來傳心要訣先儒以效字為訓謂後學者必效先覺之所為只是學中一事學字該括甚廣學問思辨存養省察與夫躬行實踐皆是要領只在克己又非逐事逐物以克之如下節人不知不愠工夫從何處做起愠的病根在那裏此中自有下手處自有一了百當處若直到愠時纔勉強尋不愠功力如何除得病根所

以聖賢千言萬語不是止教人在文義上推求亦不是依傍人的生活必言言實踐尋到用力處用力之際必步步尋到根本上纔是聖賢真學問吃緊爲人之意也又作讀書說其略曰或曰子云讀書心學也用心有道乎曰心不必言用也治之而已譬之鏡然本體光明無所不照塵垢積而體蔽縱極力用照奚益磨之而已磨之治之也讀書者止言用心而不知治心正恐所謂以心印心心以心會心者茫乎不知其從何處印起何處會得也夫生當日讀書而不能以我之心會聖賢之心以印我之心以聖賢之心之道蓋四端之擴充平旦之長養與夫存心求即心總要曉得克己然究竟如何下手只要此心作得主即是用力處夫儒釋之別正在于此以爲靜時工夫有著落豈如世俗所譏又曰尊所聞行所知須不流於弊尊陽明而不知其流弊非善學陽明尊朱子而不知其流弊亦非善學朱子蓋謂王氏高明弊在躐等朱子格物弊恐拘而不化耳所著省克引劉氏家訓學者多稱之

安徽布政使司李公學裕墓誌銘力范
乾隆十年六月朔余臥病北山閉關而外鍵之安徽布政使李公屏騶

從過余謂門者曰卽虛館必啟鑰參戶而入曰吾固知先生避客之深也吾自獲見於先生始知所以爲人之道備官中外幾二十年自省尙無負於

君國無慙於吏民皆先生之教也所懼民隱壅蔽有過而不自知今荷聖恩位邦伯而適在先生之鄉故甫入城未受印篆而願聞緒論望先生知無不言越三日而余遭危疾不辨人事者浹月及杪秋少蘇醫者曰子無他昨視方伯李公心脈已枯恐無可久之道余瞿然急通問復書曰某陳臬於蘇幾三載卽管杖已設身以求其情積勞傷氣又胃痛醫人投藥物過猛故一發不可支如有瘳卽敬以聞未十日則其子以棺斂事來謁且乞銘矣公所生三子皆幼其弟之子承嗣者雖少長從宦遊而方從師務帖括外事無聞焉幕中皆新知故狀所述惟應官及蒙

恩遇而政迹無敘列者銘辭難舉雖然義不可卻也公洛陽人雍正五年進士選庶吉士不介而造余形貌偉然所爲詩及書法皆拔俗時余學武英殿修書事因奏請共編纂見公小心畏義好賢樂善出於至誠助之曰子公輔之器也貴任不足道能如鄉先輩劉洛陽更進之爲

本朝湯睢州乃無愧於爲人公竦然及散館授檢討九年改山東道御史十年巡察直隸順廣大三府十一年監會試內簾巡視西城轉兵科給事中稽察倉場充武會試同考十二年奉使策封安南賜正一品服十三年授刑科掌印給事中轉四川建昌道按察司副使公出在外歲時必通書余見其地士大夫商旅必詢公操行及所注措故知公爲深而欲籍之則事實不能詳也其巡三郡官吏凜凜雖大府亦嚴憚焉在建昌自打箭鑪至西藏民獠威懷治行甲兩川金川諸土司相仇殺公會諸將巡視開諭皆駢首革心乾隆四年大計卓異五年引見天顏甚喜賜蟒服回任俟後命七年調江蘇糧道弊絕民憲會淮揚水災制軍德公撫軍陳公於要地多委公拯濟其冬遷江蘇按察使明允無留獄富商大豪姦私暴露欲巧法彌縫即私計曰惟法司大府三關無道可通奈何其遷藩司蘇入皆曰吾民薄祜雅太守遷聞嶺李公復移調誰其嗣之不謂公之不數月而淹忽也公處心平恕終日溫溫而不可強以非義屬吏幕友於簿書或舛誤未嘗動聲色惟默思所以正之而官中蠹胥時因事懲革眾心感服而不知其所由然痛少失怙始舉於鄉而太夫人卽世愛弟學峻如一身甫踰三十連喪耦卽以弟子

碑傳八十三

三

煥爲己子公始見余執後進禮余入翰林後公故事禮辭當卑遜而公終以後進自處及莅安徽通書忽用師弟子之稱余固辭公曰先生每以睢州助我睢州旣爲監司始受業於夏峯某獨不可繼武乎余告以自明萬歷末徵君卽爲海內儒宗而睢州乃鄉之後進也今公爲邦伯而余以薄劣爲部人敢以徵君自處哉而公終不易稱卽此一節非誠以古人爲準的而能如是乎惜乎余之所望於公者始少見其端倪聖天子累日積久以灼見其賢而不獲竟其用也然數年來余夙所心許如江西熊梅亭濟甯黃訓昭安溪李立侯皆以壯年受知於聖主始列九卿而後如影滅則不若封疆大吏尚有實德之及民也然則有心者當爲國惜爲民悲而公則差可以無恨矣公卒乾隆十年十月望後五日享年五十有五祖諱士傑父諱本質乾隆元年誥贈如公官祖妣楊氏尙氏妣曹氏俱贈恭人公諱學裕字餘三元配劉氏繼室尙氏以馳封未受錫命子四人長煥學峻次子乾隆甲子舉人次照側室張氏出次燕次焜繼室呂氏出前夫人並葬洛陽城東十里鋪某原公於某年某月某日卜兆於某岡某原銘曰

曰仁曰恭宜得其壽德載於民其聲遠聞而施則不究俛焉日有孜孜

道固宜然其淹其速則惟命之自天

戴巖

四川布政使司布政使李公如蘭墓誌銘
公諱如蘭字長芳先世由山東臨清州徙山西榆次之葺邨既又徙李邨公就外傳後乃居於省城公為諸生十有二年初仕補澤州訓導居

教職十有一年時

世宗初例改主簿以奏對稱旨受

聖天子特知遂除高郵州知州復蒙

殊恩賜御書墨刻三卷及貂皮藥香等物州當南北水驛孔道多差徭

胥役因緣為姦設夫頭四人臨時充以流句所過邨市索酒食擾居民

而歲斂民間數千金以出夫役為名公至禁絕黜胥吏之為民蠹者清

塵案之未理者民於是樂公之政為州九月擢紹興府知府歷江甯府

知府分巡廬鳳潁泗六滁和兵備道雲南分守糧儲道四川按察使

今上登極晉階通議大夫祖諱登山考諱寶誥贈如公官妣皆淑人八

年轉江西按察使尋進官四川布政使公明而有守所到察民疾苦先

其急者除之江甯人民稠穰豪右連結胥吏分地域為害公悉得其實

命捕之至杖殺數人而將軍所轄兵素瞋目眈視不知所忌公豫請於

將軍及繩以法咸懼伏莫敢肆縱四川例處流蔡聽其擇便往往羣聚

都會之地民畏其黠且悍也公條奏請以打箭爐松潘衛會理茂二州

為安插定所成都華陽為附省縣舊責以領銀納米給合城之兵準田

科之公言其所苦于巡撫得上陳均之近州縣凡善政類若此者不一

蓋公當

盛朝以實心為國家矜恤人民有所施設成得行其志又惓惓以儲士

為念於江甯則鍾山書院於蜀則錦江書院聘師置弟子恆親與講論

無異在教職日也其仁及於民雖細必為之周慮高郵地卑下城西即

蠶社湖漕渠貫湖畔湖浩渺無際冬月冰忽合客舟凍于湖之中央惟

坐待食盡公思之用小船二剖竹聯合而結其底行冰上俾得登岸至

今民以為法公嘗單騎行見水側白骨暴露詢之率貧民無地營葬公

乃購高原以畀民故公之去高郵時民送公出百里外猶哭于道公智

勇過人方為廬鳳道也懷遠至壽州湖港交通互相纏縻自明之季盜

所巢窟晝則離散捕魚夜伺客舟過蠶聚而蟻合公欲得其渠首乃乘
大舟湖流而上至暮果遇數盜獲一人餘逸去夜半望見林莽間火光
復有小船繞大舟行數次公獨端坐舟中明日歸盜遂盡得誅數人因

畫地定界某地至某地若干船船有編號增塘汎兼立保甲稽查由是百有餘年之害頓息公生于康熙二十三年十二月十五日至乾隆十二年九月五日卒於官享年六十有四娶曹氏少公三歲年十六歸公是歲公始為諸生前七年公年十三而母張太夫人歿大母季太夫人繼母劉太夫人皆以夫人孝敬嫻禮儀愛之無間公授徒夫人則勤女工用佐空乏其後在高郵製葛衫一領逮八十後猶完好雖宜澣不假侍婢手子若孫以請曰若輩未知愛惜立敝矣裏衣皆自裁製夫人識大體性寬慈常若無所忤謂見己是而人非此家庭不親睦之端端多起于婦人故生平未嘗道家庭短長夫人以子天培官兵備道承祚及家孫履謙皆官知府時諭子孫宜勉守先人之訓蓋公之晚年嘗為家訓數則所言事君行己之要道咸生平得之踐履者是以夫人每提撕焉前誥封淑人乾隆十六年

皇太后慈壽六旬誥封夫人後公二十七年甲午五月五日卒享年八十有八子五長雲鵬候選州同知次天培辛未進士廣西左江兵備道次承祺甲子舉人四川敘州府知府次思訓次念祖優貢生候選訓導女子六孫九曾孫八以夫人曹氏卒之明年某月某日祔公合葬於某

碑傳八十三

五

縣某鄉某原先葬以公暨夫人行狀來請銘銘曰民之有疾莫或問之公灼見之有鷓有鴨既翔以嬉公來勿遲惟聖天子公則是使惠民不怠涂水之谷漳湖之曲公生獄獄載錫之祺允為女僕寡怒多怡啟厥後昆為芝為鶴用答公勛鍔之識之永勿替之奕世嗣之

又四川布政使長芳李公家傳 盧文弨

文弨與陽曲李公仲子觀察君天培同乾隆三年舉人宦跡參差不獲以年家子謁見公及來公鄉公已不可作矣得觀察君所為述略因識公之為人強敏能任事而一本于仁厚使方伯連率皆如公則宇下之民尚安有失所者乎於是輒次第其事為家傳以備異日史官之采擇公姓李氏諱如蘭字長芳先世由山東臨清州遷山西之榆次曾祖諱傑人稱長者祖諱登山考諱實與其弟璽又遷居會城故遂為陽曲人公少為叔父所器年十九補學博士弟子員試輒高等而不獲舉于鄉叔父助資令入太學循例得澤州儒學訓導公是時以暇日於民生利病吏治得失之故已熟究之矣

世宗初年以例當改主簿與同輩三十六人入見奏對獨稱

旨徑授江南高郵州知州州當水驛孔道使舟往來用夫牽挽以四人為之長歲斂民間數千金為願募費官吏因為利所募夫率流勾水次居民受其擾公至禁絕科斂擇其便令可飲食宿止單騎上下巡歷弊遂絕州西登社湖駢凍合有客舟膠湖中無可為計公用小舟剖竹編聯其底行冰上如轉輪遂得濟今皆用其法在州九月積案悉清吏無所容姦擢浙江紹興府知府

世宗廉知公高郵之政特換江甯府知府仍在江南總督以公熟河務先署知淮安府稽覈一切工程數月事皆辦始莅本任江甯無賴子恃拳勇結死黨以害民號曰刺子公傳其首惡數人斃杖下餘黨始戢同城有將軍所屬兵素縱恣不畏吏公請于將軍有犯者悉繩以一切之法於是嗾相戒不敢肆經兩考遷分巡廬鳳兵備道兼權正陽關嚴禁苛索而稅益裕自懷遠至壽州數百里間湖陂瀾漫向為盜藪商民苦之公欲絕其患駕大舸偽若過客者伏健役舟中抵暮有數盜援纜而上縛其一役請急歸否則患且不測公曰此去人家遠歸安得至且示之怯益非計泊舟不行令眾人皆寢息獨夔二巨燭危坐夜半見火光隱約林莽間又聞岸上人語切切復有數十小舟劃波下上窺公舟

碑傳八十三

六

寂若無人者卒疑怪不敢動旦發有跪而請者謂昨所縛者良民公命并縛之以歸具得盜首從主名及窟穴誅其魁數人盜皆陽以漁為業公令漁船各限以地界悉編記一二數及誰某在其地劫掠者即坐之又增塘汛責保甲嗣是行旅過者始不為畏途改雲南督糧道進四川按察司使初至羅重辟者以數百計公一一平處常達旦不休訖無留獄向發配人犯任自便以故股阜之區往往羣聚滋事公上言請以打箭爐松潘二廳茂會理二州等邊地處之又奏秋審人犯定以期限軍流加等不入于死竊賊問罪不計人數皆一一報可嘗刊決獄近事比以為問刑之準其命盜等案牽連婦女者概免逮有疫者皆給子善藥囚得免瘼死在川六年調江西未幾授四川布政司使蜀人聞公來歡迎載道公首重農桑以足衣食舉鄉飲旌善良以示之勸重倉儲使緩急有所資鉛銅就地開採以省遠運滇粵之勞費乾隆九年水十一年過吏亦不至於困成都華陽兩縣倉庾之被水衝塌微爛者不以為吏亦不免公言于大府均之近州縣公所到卹災興學皆有善政而無若江南四川之在任久故其事為尤著會瞻對金川相繼用兵公督率饋

錾無乏與然常揣揣慮不免悉索驛騷之累日夜焦勞馴至於大病以乾隆十二年九月五日卒官年六十有四階通議大夫父祖兩世誥贈如公官妣皆淑人娶曹氏少公三歲封淑人逮事祖姑繼姑以孝謹聞在高郵置葛衫一領迨八十猶完衣牽手自澣以嫗婢鹵莽爲之易做也子及孫既仕官時時以公遺訓訓焉卒後公二十七年是爲乾隆三十一年五月五日也子天培既貴遇覃恩贈公通奉大夫封曹氏夫人子男五雲鵬候選州同知天培進士歷官廣西左江兵備道永祺舉人今四川成都府知府思訓念祖優貢生候選儒學訓導女六劉充智趙秦賈毓賓馮郁黃景緯閻秉升其婿也孫九履謙廣西潯州府知府由豫以潤附貢生知臨國子監生德申縣學生兆恩之烜錫璉鳴臬曾孫十一葬於太原縣許丹村之原

盧文弨曰才者德之用也有仁民利物之念而澤不下究功效不見於後世者才詘也公之仁政彰彰若此非才之能充其德者乎

世宗早識拔之于未試之初今上復委任之于已效之日遭時遇主位躋通顯設施之大宜已然公當爲學博士時已不錄錄嘗署咸陽城教諭民怨其令甚聚數千人郊

碑傳八十三

七

外謀揭竿爲亂公聞變即夜馳往諭使解散絕口不言功向使公終爲小官亦必有以善其職決不至廢墮昔呂新吾著明職一編自公卿以至庶司百執事莫不有職莫不當盡其職公之于職可謂盡矣漢之黃霸唐之韋丹其後皆至顯官而史列之於循吏舉所重也今之操史筆者儻亦用斯比也有不以公爲循卓之選者乎

通議大夫雲南按察使宋公壽圖墓志銘彭啟豐

公諱壽圖字南衡先世居河南洛陽始祖諱勝二當宋南渡時扈蹕至蘇州家焉隸長洲縣曾祖諱學周府學生弟忠烈公諱學朱明崇禎中官雲南道監察御史巡按山東守城死是爲公本生曾祖並贈光祿大夫太子太傅文華殿大學士祖文恪公諱德宜官文華殿大學士兼吏部尙書父諱大業官內閣學士兼禮部侍郎公生而敏慧九歲能作壁窠大書年十餘學士公卒已而母彭太淑人亦卒服闋後外家王氏爲援河工例得通籍雍正五年選承平府同知公才氣卓犖熟于世務每遇事當機立決無少滯甫抵任奉檄查北五府驛站時夫馬多缺額輒臨事雇募強取民間畜以應公至先覈夫馬實數次革濫應折給之弊民困得蘇尋調繁眞定時天津初設水師營造戰艦募工于浙三月集

事且令教肄津民其後歲修戰艦不煩遠募迄今便之京東大糧大望諸官田數百千頃豪猾倚勢爲姦貧民不得佃公白其弊于上官盡徹去之雍正十年攝廣平府事決獄多平反題授知保定府案牘填委應時立辦凡上官所指授心有未安必反覆力陳得請乃已十三年擢分巡清河道未兩月調通永通永稅向無例榜至是設之視太重者減之量汰額征充餉銀者以益課商民賴其利公嘗閱視河工以爲治水之道在于蓄洩得宜今潮白溫榆諸河之水由密雲順義徑北運河以達天津白溝兩淀之水復從千里長隄合子牙河由天津入海聚多洩少鮮不橫潰因于筐兒港青龍灣二處詢耆老具方略疏洩異漲加築壩工乾隆二年六月大雨河西務北隄且潰公急出錢二千緡募民築新隄躬負土爲倡畚鍤雲集甫成而舊隄潰微公民不得生是秋復苦勞實抵諸邨尤甚公核災民以十三萬戶口報上官詰責頗切公力爭乃許公素性慷慨遇事侃侃無回互爲同僚所忌自願就簡以避之上知其才特調往雲南補迤東道督濬金沙江勞績居最十一年計典卓薦十二年金川用兵往軍前總理臺站兵罷乃旋公之在滇也撫循邊徼以甯靜爲治尤自刻苦家無餘貲尋有疾卒于官年五十有一後

碑傳八十三

半月奉

命遷按察使公已不及聞矣悲夫公配王淑人子三景玉河南歸德府通判英王直隸通永道昆玉山東分發縣丞女六人兩適武陵知縣蔣耀宗一適湖南蘇谿巡檢鄭士烈一適秀水庠生胡兆奎一適雲南呈真知縣唐思一適甯夏庠生趙曰洵孫十一人鑣候選州同鏗太學生鈞候選從九品鏗太學生鏡湖北均州知州鎔內閣侍讀錦太學生錯錕鍵銛俱幼女孫十人今以乾隆四十七年十二月癸酉窆于吳縣和合山新阡公與余爲中表兄弟幼相習既通籍書問往復得悉公所施設而頗以公未盡其才爲恨因諸孤之請爲志而銘之銘曰胥江之水揚漣漪章平世美鍾奇姿翔翔雲路當熙時剖決機要斷不疑燕南趙北瓦地維籌畫利害如列眉方輪長轂堪遠馳天南萬里揮旌旗垂効恩光沛綸絲設施未竟悲數奇魂歸仍返五湖涓涓時渴葬何遲遲和合山下歸藏宜子孫繼承福永綏謂我悼史言無欺石有時泐銘不移參政田公震家傳第世第公名震字又起別字文湖參政蒼崖公之次子初仕官盛京刑部員外

耶轉本部湖廣江西二司出知姚安府府境多山田饒確有大石湖當萬松山下爲眾流之衝公相視地勢隄其下瀦水二十里溉田可萬頃無憂陽旱調雲南府先是普思蠻叛被繫者五百餘人將伺懈爲變公廉知其謀爲計畫俾亂不作境得安又調臨安所轄苗疆其土司死子幼諸弟中有越次圖襲者當事俱爲所蔽公至得其情實立正之乾隆已未以治行第一奉

詔入都蒙恩賜蟒袍貂皮人葆香珠等物已有命待擢監司之任會大吏議開金沙江通銅運而公在臨安曾治道百四十里用車牛運銅事稱便以善經畫倚公檄往督理凡六易寒暑乃竣事丁卯授陝西驛鹽道未之任改湖北驛鹽道庚午兼理武昌樞政以前冒滇中瘴氣毒發卒年四十有五公素謙謹遵父兄教十歲屬文卽與伯兄並以才名見稱稍長入都族父陽城相國尤愛之京師貴人皆欲出己門下爭致關節卻不受至不入闈以自明公嘗謂吾生平錄錄仕途於道無所聞惟有韻之文略未荒落可信者惟此耳然公慙官滇楚循良之聲聞於朝野苗疆民乃取其所斷疑獄演劇記之凡遇事有卓識滇中舊不報災公始至姚安值歲旱慨然曰

碑傳八十三

九

朝廷以赤子付有司雖遠猶近而遺之乎請於臺司獲賑恤此後遂以公報災爲例木期古處東川江外不隸滇蜀無頭目鈐轄行人過則出爲寇鈔公之在臨安也減車從入其阻曉諭朝廷德意因示以威信眾聞言感激求內附歸復視要害數處設堡寨寇患遂息

山東布政使李公渭墓誌銘沈起元

公諱渭字菴涯號素園姓李氏先世爲潞安府長子人明永樂間諱福者始遷高邑五世祖五倫東昌府通判生三子長標明武英殿大學士兼戶部尚書諡文節次模爲公高祖贈奉政大夫曾祖士劭淮海兵備道祖伸進士韶州府推官改知河南永甯縣贈通奉大夫考兆齡知福建閩清縣封中憲大夫贈通奉大夫生五子公居長公自少力學尤熟於史好窮其治亂盛衰之故爲人篤茂愷直勇於任事其內行修其居官視民疾苦如身被創日被刺於去害與利如嗜欲辛丑成進士授中書科中書舍人司寇勵公薦授刑部主事雍正二年司寇高公勵公應詔舉公能勝道府之任授岳州府知府時

上方整飭吏治欲周知天下利弊特許公具密摺得非時達以知府得

此誠異數而湖南大僚已側目不半載假浮語被劾事旋白起武昌府同知未履任丁母憂服闋起授嘉定府知府適有冤獄公力爭之致失上臺意幾及禍公曰吾官可棄殺人媚人不爲也旣而事卒以有濟健爲張某以姦殺定讞公疑之請檢尸無一傷立釋之重慶水災主者撫卹未善制府委公馳往冒風雨徧歷賑給所活多而公於此感寒致永抱骸患丁父憂歸服闋授彰德府知府時撫軍雅公方分選幹捕緝盜議立總捕以統之公得檄極陳不可雅公曰余令方行府縣遵奉恐後李守獨直陳所見規我此賢太守也遂重器公郡舊有萬金渠源出善應山環府城入洹河灌田一千數百頃久廢公履訪遺蹟濬治倍加支河撫軍爲勒石紀之渠流所及歲以有收漳河爲南北孔道舊設草橋於臨漳道回遠公捐金爲長橋於豐樂鎮行旅便之武安班某被殺誣坐其族弟公一訊立釋之林縣富戶毆殺人厚賂尸屬以病死報公委員檢尸骸骨盡碎富戶伏辜撫軍謂公治行最十府八年以卓異薦遷山東鹽運使奉節議增東運鹽引公持議不可詳院奏寢十二年東省大災撫軍委公勘至益都等數州縣被災甚饑殍滿道而有司已報不成災公據實請賑撫軍已入告難之公爭至再至三乃曰旣格於例

碑傳八十三

十

皇上聖明乞具奏災狀請以借作賑異日免追必蒙聽許撫軍從之得報可公自二月至四月目擊凶災慮無以救遂致劇疾口喃喃作語門外饑民如蟻哀哀就斃奈何語日夜不休侍者曰上臺已發賑矣公張目曰果否對曰信公少息已復語如故如是者半月乃痊十三年遷山東按察使持獄平嘗曰歐公云求其生而不得近日俗吏移易獄詞朦上何求生不得之有不思生者倖矣如死者何此婦寺仁非持法之正尋遷安徽布政使旋調山東布政使爲政持大體不吝出納使有司得展布不輕揭一官亦不爲煦煦熱有所不可即平日所心許者訓斥不少假亦無宿於心者中丞鄂公楊公皆稱爲老成長者初公爲嘉定府請訓同列數人

世宗獨謂公曰汝乃實心辦事人也授安徽後摺請詣闕請訓

上批不必來京常以實心行實政勝於請訓是公以實心受知

世宗受知

今上爲不世之遇行大用而遽以疾卒矣年七十乾隆十九年六月十五日也公至性孝友閩清公罷官後家日落次子淮癸卯進士選翰林院庶吉士三子湯候補知縣相繼夭四子法孝廉爲歷城令坐虧空被

効常感歎無聊公於諸弟事一身任之無令老人經意弟滋旣以虧絜
論死繫獄時法未有子公一子經芳年十四乃謂其王夫人曰吾弟倘
無生路有司究家屬將及老人可奈何吾欲取吾子嗣之以當承追之
累卽追諱諒不至死若勿過慮王夫人方病臥未及答公卽出以秋審
迫馳入京行至南宮去家百里夜得噩夢疑夫人有變心動旋計一至
家倘遇變必不能卽出吾弟生死關忍不問耶遣一童持甘金歸脉遂
趨至京已幸得緩決乃馳回則王夫人一棺在殯矣噫嘻以兄弟急難
至妻死不顧不得一訣難矣已得嘉定府則密囑法曰爾窮稱有貴在
兄所乞沓追可也公在川得東省咨則詳請歲以養廉扣償未幾蒙
恩豁免乃釋歸法性豪侈公歲以數百金資之迄至官所多所取用公
弗之禁幼弟冲少孤育於公旣長爲援例得兵馬司副指揮選授東城
公仍歲予三百金以勵其操旣得卓薦遷雙流縣復爲償積逋資其行
孤姪縉芳公以子眎爲諸生屢試不遇則爲援例爲學博士而公自奉
極菲中年喪其室不蓄婢妾所至獨處斗室如老僧官署內寢皆弟姪
家口居之衣敝食羸無所擇獨嗜書至老簿書暇輒手一帙居官數十
年未置寸土一椽平生急人患難有大僚驟獲重譴其人與公非素厚

神傳八十三

土

籍後舉家寒餓將北歸公慨然曰雷霆不測自是

國法然吾司其土忍坐視其立轉溝中爲道殣乎密令有司周之內外
食飲衣裘臥具靡備令勿言貲所自出其人承命措置約千金受者及
遠近聞者皆歎是人高義而公終不自言歿之日賴眾人之賻得孤櫬
歸里公配王氏贈夫人於雍正九年八月九日先公歿葬於高邑縣西
五百村先塋子一經芳庚午科舉人孫男二曉昕經芳篤行好學克承
其家風將以二十年月日合葬於王夫人之塚來請銘余與公同榜進
士又同官河南公在山東子主濟南濼源講席朝夕見及臨其喪其忍
以辭銘曰

俗趨機巧誰則誠獨矢實心
帝知名拯溺救焚保赤嬰出入簡聽持法平廓乎洞達絕府城赴義如

驚勇不驚鶴令急難瓶罍傾於家則瘠於道盈吾銘幽宮垂世型

中憲大夫浙江分巡甯紹台道葉君士寬墓誌銘

葉君映庭以乾隆二十年夏六月卒于家越一年冬十一月將葬矣孤

子來徵銘啟豐以重表末行服習君生平行事又嘗視學浙中獲聞君
善政浙東西謳思不忘及君養疴里居而啟豐適以陳情歸里親送君

彭啟豐

之喪讀狀所述其歷官政蹟卓然有古循吏風是不可不銘案君姓葉
氏諱士寬字映庭系出宋少保石林公五世祖諱初春明給事中贈光
祿少卿高祖諱登道曾祖諱時臣皆贈文林郎祖諱子循順治四年進
士恩知唐縣漕安邵陽容縣事父諱台陽試授州同知以君貴封如其
官妣王氏贈恭人君爲人覃精向學自經史百家駢偶聲律靡不研討
旁及象緯輿圖句股六書之學皆窮其奧通達政體愛物澤民惻怛周
至所至民咸懷之康熙五十九年舉順天鄉試雍正四年試取內閣中
書以知縣用初任山西定襄縣八年遷沁州知州其爲政善知民隱揭
棄煩苛遇事必躬親指畫一不假吏胥手事以辨而民不擾權潞安知
府除諸稅之無名者復四門集以便商人民大懷畏歷權平陽太原再
權路安治行爲山西最十二年大計以薦入朝
上賜蟒袍擢紹興知府乾隆二年移知金華由是晉階分巡諸道始終
在兩浙云其治紹興也有惰民格士而般之眾士譁將罷試君在三江
閘聞信飛騎至數言剖解試如初浙西風潮大作海塘陷君往堵築三
月而塘工完其在金華時東陽縣饑求賑者呼號集城門以萬計君曰
按冊施賑是賑冊非賑民也單騎往諭之召飢者前立注其名于冊而

碑傳八十二

士

撻其二人民乃定二人者一婦人先以訟至官服華服至是易敝衣求
賑君識之褫其敝衣內華服如故一男子容甚澤飲以卓焚湯嘔出酒
肉眾驚冒賑者多散去居官三年多惠政旣去金華人思之爲立生祠
歲遇君生日輒張燈合樂以祀君其前在沁州也亦然有武入自沁來
者過君祠適遇君生日祭獻者至擁馬首不行時君去沁已數年矣四
年授杭嘉湖道嚴保甲守望之令盜賊屏息明年移金衢嚴道衢州地
勢高西安龍游諸縣築壩蓄水以溉田商人入山伐木私開壩行水日
涸乃嚴其禁民稱便初君蒞嘉湖時桐鄉豪家許訟有以金饋者君急
置之法獄未具卽調金衢繼事者果以贓敗事連巡撫坐死總督德公
委君推鞠君言巡撫實未嘗受贓覆治之得金數千于用事者之家巡
撫獲減臯八年移甯紹台道釐關政修戰艦巡歷外洋雖險遠必至紹
興被水蕭山諸暨民多挾眾詣縣求食巡撫聞而惡之不欲賑君往視
還白巡撫曰某來時蕭諸之民奄奄無氣息張口以待哺何忍見其悉
填溝壑邪言訖痛哭巡撫心動聞于
上遂得賑君嘗言待饑而賑所活幾何欲爲民本計者其唯修水利乎
議復紹之鑑湖甯之廣德湖大興灌漑之利會去官乃止著浙東水利

書冀後有行之者也十二年以父喪歸服除遂不出君在浙時每加意書院以作人爲己任至是屢集諸生校試文藝興起者甚眾平居孝友之德著聞鄉里見于狀者詳焉茲不著君生于康熙二十八年距卒之年六十有七妻郭氏顧氏皆封恭人先卒繼室劉氏生子樹滋樹著皆太學生女一適趙幹麟銘曰

唯古仕學必兩優通經致用彰遠猷今人治絲多紛料刀筆篋篋吏治羞君之設施本末周襄帷觀察勤諫誅拯民疾苦同納溝山右兩浙騰輿謳樂公社畔民何稠年雖不逮名自修我銘其藏告之幽繩繩孫子

縣千秋

誥授奉政大夫掌山東道監察御史湖南鹽驛長寶道按察司副使謝

公濟世小傳

謝庭瑜

從兄諱濟世字石霖一字梅莊解元贈通議公孫世父封庶吉士贈御史屏山公諱賜紋子也生而聰敏過人讀書驚其行輩年二十領康熙戊子鄉薦第一壬辰成進士選庶吉士授檢討丁酉順天鄉試戊戌會試兩充同考官所得皆知名士雍正四年改御史未浹旬露章言三事上霽顏問云何對曰一錢法一鹽法

神傳八十三

十三

上曰錢法大難朕方籌畫復三奏河南巡撫田文鏡不法狀

上上憚曰彼號能臣朕方倚任爾毋惑浮言誣奏以奏章擲還公伏地不肯起爭益力

上怒付法司鞫問幾罹不測賴

上聖明鑒其愆直免死戍軍臺

今上御極首賜環復御史任以母老乞外補

特授湖南糧儲道善化令樊貽德收糧厲民公易服爲鄉民往納得實揭兩臺請參格不行詣撫軍許容面陳狀詞過激許撫恚甚列款糾參

鍛鍊成獄民情鼎沸御史胡定采民謠以聞

上命侍郎阿公里袞馳讞湖南士民數千人載香迎馬首跪稱冤至則盡得挾私誣罔周內狀力爲平反坐許容以下藩臬守判及樊貽德罪

而公得雪改授鹽驛道以老病休致家居十有二年卒年六十八公居諫院有直聲名動海內每疏奏

上多嘉納然終以強項不爲時容仕故不顯云公在塞外九年得究心聖籍著有函匪十經及以學居業集史評纂言內外篇離騷解西北域記一時紙貴洛陽遭母喪見世俗居喪尙浮誕不師古著喪禮甯儉錄

以風焉

予既爲此傳有未悉當日情事者欲剗削大半因摘錄一二軼事附左以見梗概云公在軍臺讀書不輟平郡王及公大臣博爾屯伯大臣欽拜皆遇以殊禮欽伯則北面稱弟子夸藍大以下受業者無僕數其居室飲食皆王公大人爲之營辦尤精易理所著易在曾進

御覽有軍中學易圖當代名臣碩士各有題詞乙卯冬召還入都每出行兒童婦女填溢街巷爭欲識面士大夫造門請謁無虛日平郡王命嗣王從受業適得二獵犬進奉語次及之公曰進犬非王事若能進一二賢臣豈非千秋佳話王顧嗣王曰侍御良言真古人箴規之義不可忽也慎郡王聞公名思一見平郡王爲諭意公曰曳裾王門恐於義未可卒不往值朝會廷臣咸集平郡王指目曰此謝侍御也王乃前握手如平生歡比公外任二王親書詩聯以贈行云

范廷楷傳

諸城縣志

范廷楷字端植乾隆元年進士授戶部福建司主事陞江南司員外郎進郎中九年擢福建道監察御史上疏通籌國用謂糧稅徵收有定額

碑傳八十二

十四

而動用之項惟兵餉居三分之二合籌出入僅僅相數宜令天下綠旗營許在京旗兵充補移旗兵一萬歲可省銀三十餘萬又請會計錢糧以節尤費蓋廷楷在戶部時已熟諳財賦故入臺卽以爲言勘獄多不肯附會有救父而誤殺叔父者已擬極刑以廷楷力爭得減連丁內外艱十五年服除補廣東道監察御史時有常甯者因他獄被拘忽代二格訴甯殺已狀蓋甯殺二格已八年至是甯自吐之刑部擬寬甯大辟廷楷上疏言此案到部之時人言藉藉或咤爲神奇或黜爲怪誕要皆疑信參半此殆常甯五更夢囈偶不自檢正申竊所謂其氣燄以知供而非實有二格憑之使言也部臣謂供出常甯之口不准自首不知供出何人之口始准自首抑豈冥漠之中果有借其口而言者乎臣謂此獄准自首而黜鬼供則疑者尙可信錄鬼供而黜自首則信者皆可疑此刑罰之防亦正經之事也廷楷前後疏奏明辯皆此類十六年巡視北城十七年擢戶科掌印給事中巡漕通州力剔積弊於江西浙江諸省運船檢得陋規計簿計其自南而北漕員需索至四五百金奏請交各督撫河漕密勘漕員得罪者百八十人是冬

命同巡撫鄂永安郎中阿桂往江西勘僞稟獄因署撫州府知府俄陞

江西按察使贛州曾翊唐妻邱氏率幼婢與姒鄧氏索債於李姓邱以宿病猝發死其弟邱習教及翊唐誣李與鄧有私殺邱以滅口知府葉使僕謝陞訪其事陞受習教銀三百兩覆如所控狀鍛鍊成獄連六十餘人廷楷鞫幼婢得實知府始猶力爭繫陞發其贓乃摺服廷楷秉臬年餘平反七十餘案咸頌為神明二十年緣千總李芳春自殺事吏議革職奉

旨引見仍以戶部主事用補雲南司二十二年詔交直隸總督委用補東路同知時有邪教獄連逮甚眾廷楷力辨女巫以鉞綫惑鄉愚非邪教盡釋其無辜者二十三年授遵化知州州民多以車馬謀生而轉運陵楛日需車數十兩民苦之廷楷請於上官造車十四兩買馬六十匹備運米豆草束乃不復擾民廷楷性峻直諳吏治所至皆能自見年五十八卒於官

中憲大夫浙江海防兵備道莊君柱墓誌銘 彭啟豐

乾隆二十四年夏六月丁巳武進莊君卒于家子往哭之過時而悲及冬會葬望其廬歔歔流涕彷彿其生平昔東坡子少游之死歎世無復有如此人今莊君殁子亦云然始子與君為同年友偕謁座主沈端恪

碑傳八十三

五

公端恪當代名儒以正學導後進見君恨相得晚君平日以躬行實踐為本愛人利物為施為庶吉士同館推博雅顧獨不自喜方是時

世宗憲皇帝嚮用儒術稔知君有才出君為大興知縣先是君以雍正三年考取內閣中書引見

命以知縣用君自謂不可以民人社稷為學歸而讀書于天甯寺中三年至是以詞臣尹首善地人于是覘君之設施而仰

憲皇帝之知人善任使也君為縣一本樸誠甫下車卽約束吏胥毋擾民有所廉察單騎至左右莫能偵或訴道旁卽剖決遣之不使涉公庭每論地方利弊興革所宜洞悉周至無不見諸實事縣舊供羊草歲數十萬積數任皆以虧帑獲譴君請于戶部歸奉宸苑辦理旋奉

旨給銀一萬兩貯縣以備公用人謂君遭遇獨幸不知其誠有以致之也雍正十二年九月授温州知府初蒞任問民疾苦卽言于總督曰州

民土田外唯恃魚鹽自鹽法壞而民困倍輸雖不能駁議變通宜以正課外滴耗留備荒歉玉環有魚稅有梁稅宜免征塗稅以省重科溫與

括蒼相接三百餘里中征稅三雙谿離溫遠非名鎮市集有貨物可征宜概子裁革樂清自清丈後增額十萬畝磚塗之田照上則科徵宜酌

蠲以抒民困時雖未盡施行而免稅減糧數大事至今賴之乾隆二年秋風潮害稼君議陳四事一暫通海運一借鹽項餘銀買米以賑一停買穀還倉一以鄰近倉穀通融轉輸大吏以爲迂既知不獲已悉如君所請行濱海土田以塘埭陡門爲捍衛時大半毀壞因寓賑于工全活無算于斷獄多所平反永嘉縣民傭于人代主家認辜抵死君廉其枉再三諭曉其母始泣下以情告乃坐其主而出之樂清縣役誣武生某行竊斃其命以拒捕自死報君證驗反覆遂得實其矜疑察冤多此類乾隆四年七月

上以公治最有聞授浙江海防兵備道時撫臣奏築尖塔二山海日君親詣相度謂沙勢坍漲不常速則易塞緩則難成在多鑿石多集船功可立俟于五年二月興工日夜勞來役人感其誠咸盡力洪濤際天斧鑿聲相應不三月工竣用帑二萬餘兩魚鱗石塘尖山壩工與凡隄防之以時修理者區畫至悉迄三載鬚髮盡白疾作請解任大吏勉留之不可君之待下也正己以率積誠以孚其事上官也從則歸美如不及不從則默自咎當孫文定公爲順天府尹以屬吏白事侃侃直陳相得無間越數載文定特舉以應詔謂實能以愛養百姓爲念者此可謂知

碑傳八十三

共

君矣家居十數載敦本睦族爲鄉人矜式令子伯仲相繼及第同時出典試同乞假歸省海內榮之君處之泊然惟勉以竭誠報

國而已君最善書詩文亦有家法稿成輒散去素以炫名爲戒遊藝之工非所向也予以姻戚通訊問間一往來談論輒移日子當世吏治之得失尤倦倦致意焉卒前一月予往視病猶握手慰勞如平生不一月而赴至矣予能無慟乎哉君諱桂字書石雍正五年進士生于康熙二十九年七月先世自金壇遷武進曾祖諱廷臣明萬曆中進士官至湖廣左布政使祖諱鼎鉉父諱絳皆以積學敦行聞于世乾隆元年贈如君官祖母毛氏前母陸氏母董氏並贈茶人妻錢氏封恭人子孫存與官禮部右侍郎培因官翰林院侍講學士後君一月卒孫四人孫女九人今以十二月初二日葬于德澤鄉林莊之新阡銘曰惟古于仕以行其學措正施行猷爲卓犖君在玉堂羽儀鸞皇牛刀一試聲譽騰驤考最分猷載瞻熊軾不染脂膏好是正直御屏首列宣力有爲眾人之母慈惠之師刺章具在式茲寮窠好爵莫靡急流勇退君子友朋款款心傾士馨其德眾孚其誠曰仁曰恭唯德宜壽何數之慳而施不究幽宮早闕馬鬣加崇鄉名德澤廣畝慶鍾丸

丸松栢堂封孔固佑啟後人來章有譽

碑傳八十三



碑傳集卷八十三

貴筑黃彭年編訂

碑傳集卷八十四目錄

乾隆朝監司上之下

故中大夫光祿寺卿前直隸布政使沈公起元事狀 彭紹升

陳兆

廣東知韶州府事前分巡廣韶連道監察御史薛先生菴墓誌銘

通奉大夫福建布政使曹公繩柱墓誌銘 沈廷芳

錢陳羣

宮方伯爾勒暨元配李夫人合葬墓誌銘

朱筠

劉先生士銘行狀

陳宏銘

太僕寺少卿介先生錫周墓誌銘

法坤宏

永北劉方伯公慥善墓誌銘

袁枚

中憲大夫何公達善墓誌銘

袁枚

浙江按察使李公治運墓表

誥授通議大夫山東提刑按察使司按察使原品致仕恩加一級沈公廷芳行狀

汪中

雲南迤東道錢君受毅墓誌銘

王昶

乾隆朝監司上之下

彭紹元

故中大夫光祿寺卿前直隸布政使沈公起元事狀
公諱起元字子大世居江南太倉州高祖諱文明封儒林郎曾祖諱衍
應父諱受宏鄉貢生通經術隱居教授著書數萬言殉祀鄉賢祠兩世
皆贈奉政大夫公童年能文章年十八慨然有自立之志為諸生敦厲
廉恥嚴義利之辨居母吳孺人喪依古禮不御酒肉不內寢其後父喪
亦如之康熙五十九年舉鄉薦明年成進士補庶吉士以父病乞歸父
歿服除入京雍正四年改授驗封司員外郎尋兼考功司明年

命往福建以知府用總督高文良委署福州府移興化時

時

世宗聞閩中倉穀多虧遣四大臣率謁選府縣官六十餘人往按有司
被劾者十居五餘悉解任聽勘受事者較計升合爭為煩苛公獨持平
宏大體興化屬僊游令受代不肯收碎米公怒曰穀以備賑碎米獨不
可食邪令謝過乃已糧道李玉鏞聞而歎曰近日閩省惟建甯興化為
光天化日矣建甯守姜君亦良吏其屬官多賴以得全者也莆田有黃

碑傳八十四

一

陳兩家連歲訟不決乃結黨互毆有南北黨之目上官恐其釀亂將悉
捕治之公責兩人而釋其餘報曰粵由主者懲之畢矣餘不足問也
詔以閩人不善官音令督撫教之學習興化土音尤詰屈讀書了不可
辨公建正音書院擇閩人通官音者為之師集諸生以四聲教正經書
俾轉相教授上官宋其法頒行諸府在官禁屬官饋獻府倉壞出私錢
興造一不以擾民巡撫常安委攝海關司關向無養廉責諸關口差役
歲輸金三千以給公請於巡撫革之並革洋船規例數千金巡撫有家
奴守關欲浮收糖稅不得格二十餘船不行公聞立督收稅如額放船
行而白其事於巡撫巡撫召家奴切數之由是人莫敢不奉法及常去
代者朱定元向公問常奴賊狀公不對朱疆之曰起元但知常公任內
革除浮稅四千金它非所知也初高文良奏開南洋
報可已復禁內地商久留外國文良下令出洋者必戚里具結狀立往
還期限逾者連坐公進曰此法立將一船不得行文良問故曰出洋者
生死疾病無常數貨物利鈍無常期此豈內地戚里所能逆料而為之
具狀乎且公不聽開洋則已今聽之商人造船集貨費無算忽以結狀
瘼之是明利之而陰奪之也商何望焉文良曰君意云何曰但令商自

具狀過三年不歸者不聽回籍以此牒部足矣文良喜令商具狀如式
部例洋船水手多寡視梁頭大小商苦納稅大輒報小及出口船不得
行泉防同知馳啟督撫議增水手公方奉檄放船商環集求驗放且請
聯舟互濟免增水手同知欲候督撫令下不可公夜詣同知曰水手定
額工部所頒督撫不能增文移往復轉展駁詰商船且不得行南風將
起彼情急必生變君其危哉同知不得已許諾則眾已洶洶集同知門
矣初兩院得同知啟方愕眙不能爲計及聞船已放則大喜守興化三
載史文靖公奉使至閩以牧守優等第一薦攝臺灣知府臺田一甲準
十一畝有奇賦有上中下則上則一甲收穀八石中則六石下則四石
視內地加數倍然率多隱占民不甚困時丈量法行占者不得匿公將
赴臺文良語之曰吾欲使臺田悉視同安下則起賦但恐不及故額致
部駁奈何公曰此事籌之素矣宜令著籍田且仍舊額而丈出者視同
安起科俟隱占既清更減舊額重者均於新額之上則賦不虧而民不
病文良以爲然及至臺大風壞海船廬舍人民率漂溺公單騎案視賑
給流民多所全活時有山猪毛社生番之擾議設寨山口斷其出入南
路遂甯新守至還興化先是同安縣民有冤獄按察使潘禮豐不能察

碑傳八十四

獄成總督命公覆訊直其冤潘坐是銜之中以他事部議降四級用遂

如京師尋告歸高文良總督兩江聘主鍾山書院

今上卽位召入京授河南按察使夏大雨災被四十六縣飢民四走布政
卻之乾隆二年授河南按察使夏大雨災被四十六縣飢民四走布政
使欲開之公曰民飢且死奈何禁其它徒昔田文鏡以此獲咎可鑒也
今邊境州縣有未被水者宜安插流民給口糧俾毋出境其可從之屬
吏報鹽梟四十餘拒捕傷人已而獲者過半法皆當斬訊之自四五人
外皆飢民請於巡撫雅爾圖斬三人戍二人餘杖遣而已巡撫令府州
各設書院屬公總其事公以教士當先實行頒鄉先輩陳確菴敬愈日
程自大梁書院始進諸生示以省身克己之學覈其程而加差等焉巡
撫立章善坊令諸州縣舉孝子悌弟義夫貞婦登其名公采訪事實著
章善錄板行一時風動有兄弟爭訟累年忽大悔讓財產友愛終身七
年遷直隸布政使明年大旱七月總督高斌自江南視河工還公迎謁
固城議賑事高欲遲至仲冬公曰飢民朝不謀夕豈能久待請先普賑
一月再查戶口分別加賑高愠曰必如此君自奏之公出語清河道方
觀承曰普賑萬不可緩時之安危民之生死在此決矣子其圖之方入

言於總督卒從公請時有縣令倡言賑戶不賑口公怒曰一戶數口止賑一二是且殺七八人矣移檄州縣有犯此者梟之戶部尚書海望奏

清直隸旗地有司違限奉

旨飭責高恐命公劾數州縣以應命公不可曰旗地非旦夕可清州縣

方災何暇了此獨効起元可也乃止九年內轉光祿卿尋奉

命稽察宗學居閒讀易折中古訓著周易孔義十三年移疾歸歷主濟

南揚州太倉諸書院晚而杜門日誦先儒書病中手鈔明道先生語錄

臨終語其友曰平生學力無住手處年來日夕檢點身心仰不愧俯不

作或庶幾焉卒年七十九所著書自易義外有敬亭詩文集十餘卷刻

行於世

謹案原編有去劉河七浦新聞議一首已見經世文編今不錄

廣東知韶州府事前分巡廣韶連道監察御史薛先生醞墓誌銘

陳兆

論

先生姓薛氏諱醞字叔芳號尺菴晚自號小輪老人陝西雒南縣人年

八十有一病卒徒所曾大父國用明時兵部侍郎遼東經畧大父敦倫

拔貢生父繼祖虞生生三子先生其季也博極羣書不泥章句年二十

有五舉於鄉又十有九年庚戌成進士改庶吉士又六年以編修改御

史在臺二年多所建白凜凜著風采

碑傳八十四

三十三

上心識之特授粵東廣韶連道行且大用顧先生每爲上官及僚屬所

誑誤迭遭顛跌竟以罪廢土論惜之分巡事煩簡易理會部檄於所屬

曲江英德開採銅山而瀕海之番禺東莞等縣積有沙田訟牒未結者

三百餘案先生適丁其時爲總理較各路爲劇又事關金穀情僞萬端

一之不慎隱患最鉅然皆以次就緒國課裕而商民悅服蓋心力並瘁

之效見於始事者如此粵江堤工繇互虞肇二府前議改築石工以鹽

羨抵費既報可而估直不敷採辦守令顧畏不敢言工亦不就先生相

其水性非淮浙比請改用零雜塊石以代尋建長堤七八千丈護民田

億萬畝大吏察知費省工堅力爲聲明報銷遂得免議無事自乾隆二

年抵任至乙丑歲中間一署督糧一兼權關所條具恤商事例至今遵

用而各關之弛放麥稅實自韶始其年七月因公落職未行以督臣薦

起知韶州府再兼權關前數月再署糧篆人方謂上游於先生信重之

深又如此先是道倉收米幾倍正賦高郵王文介公來撫始釐剔其弊

至先生始退私斛用部額概量平恕亦無缺額惟是銀米兼收旣成陋

例而先生署篆纔三月未及申禁因爲後任乾沒劾案所牽無以自明

時先生已移疾自韶歸里六年頗不省記前事但憑倉吏列狀

上以其祗節有素一旦與眾同牒蒙議卽宜有罪罪且宜加等遂準部

擬論遣於山東樂陵安置先生狀貌甚偉目炯炯有光擇言而發舉止

嚴重余由詞科改官選館在後雍正乙卯始得修謁邸寓心異之疑向

者榜下未嘗見此人同里孫公虛船以紀事一篇見示其畧曰王子除

夕詣薛君問何以卒歲曰有門徒以白金十兩爲壽用其六而四存焉

爾語次及年友李某囊無一錢臨窗嚮榻則呼童奴曰來取吾金分半

與某去又語及某近狀畧與李等則又呼曰來取吾金分半與某去孫

公駭歎故爲存記焉謫居樂陵十五年遠近來學者眾束脯外一無

所受所從學爲文取科第及以著述名者往往而有齊魯間多以師禮

事之嘗謂子宁廷曰頗聞汝曹謀斂他人財爲我納贖審爾富以不孝

論朝廷處分臣子分當順受吾身後但當枕東北以望西南可矣嗟乎其

意若以悔責謝吾

君以瞻望慕戀慰其先世是可哀也乾隆元年及五年兩遇覃恩晉贈

祖父朝議大夫如其官祖妣暨母劉皆贈恭人元配張無出例贈恭人

繼配劉恭人生子二長宁廷丁丑進士翰林院編修次介廷廩貢生候

銓教諭女適某孫某著有某某等集其在朝疏奏見卽抄在外與當事

往還筆札具詳家傳文繁不載宁廷奉遺命卜兆於樂陵城北二十里

將於明年二月下窆而遣介廷冒風雪走千餘里來乞銘銘曰

昆弟老壽歲皆近百篤敬其兄恩撫其息崇飭宗祠諦審兆域內行若

斯忍辜
天澤載觀游處言必久要家無僮石急人啼號不待叩門邊計來朝素
行若斯肯潤脂膏人生如寄四海一身理骨奚擇慕天席塵其先自晉
亦徒於秦又况鄒魯弦誦猶古小輪是宅別爲支祖鬱鬱佳城柏香心
苦
通奉大夫福建布政使曹公繩柱墓誌銘 沈廷芳
乾隆二十有八年冬十月己丑福建布政使曹公卒於位時大府以及
士民胥泣下其孤穎先等奉其柩歸將葬其鄉某原來請銘余不敢辭
公諱繩柱字匪石更字介巖晚號壽安曹氏世爲新建望族曾祖以炳
高才名於時祖某考家甲康熙丁丑進士龍溪知縣有治行二代以公

貴贈通議大夫龍溪子七人公行六妣黃氏生妣沈氏贈太淑人公幼
讀書日數千言九歲沈太淑人歿黃太淑人撫教之及長孝養無間康
熙庚子舉於鄉尋丁外艱盡哀禮筮仕中書舍人雍正庚戌成進士卽
授刑部江南司主事異數也詢獄情可矜者請未減升本部湖廣司員
外郎偵知遣犯僱替親捕眞犯實諸法擢湖廣道御史巡視東城諸建
白悉焚其稿嘗齋疏至通政司

皇案前堂官不起立公譙之且劾奏後乃敬受如禮乾隆元年改杭嘉
湖道植湖郡水災請賑卹全活無算閩饑公運浙米十萬石航海速抵
閩閩人歡呼浙西三郡漕繁而弊甚公廉得某邑尤不飭微行厥間按
實牒報某以失察家人事誣公賴尚衣伊公雪其誣得白丁內艱歸尋
補湖北鹽道爲設粟覈以官鹽價遂平武昌金沙洲堤久弗治公築堤
捍水水患絕田俱成腴且無病涉者兩江歲儉楚民出積粟往糶牟利
適監武昌關稅度足濟民食卽截留之三省均無匱乏巡檢某運米舟
沈米掩大半懼將投江公爲代償時已舉卓異因以廉俸補倉穀罷職
例往軍臺蒙
特有歸里辛未歲迎

鑾淮浦命還原銜其冬赴闕恭祝

五

皇太后萬壽加一級

召見授南汝光道豫省積歉公悉心安集方閱賑時見汝甯郡城沿河
河入汝水逕甚窄凡三折始匯於汝公以河淤曲易漫城必受汨議於
折處開引河以注汝水遂平尋奉福建按察使之命上奏請嚴其科條分
命閩素德公且龍溪名父舊治也爭先迎謁公慰勞焉顧俗曠健訟凶
徒殺人率賄人詐認或毆傷輕者認重乃奏請嚴其科條分別械鬪處
分及臺灣重案由道訊解均蒙
俞允不輕用刑治歸清肅攝藩篆凡清吏治惠民生出納財賦鉅細必
親今年夏擢布政使階通奉大夫公尤奮勵宣幽理滯愛育士民同官
總和以成康濟銳意焦勞得肝疾遂以不起
聖天子方當嚮用未竟厥施惜哉公平生仁孝友愛交友必竭衷曲爲
人所難能工文章筆不加點書法道勁直公餘事耳生於康熙四十一
年六月三日春秋六十有二夫人裘氏封淑人先卒子四穎先貢生羣
玉附貢生寅生國學生可先尚幼孫七恩孫國學生憲孫億孫憲孫志
孫愈孫恭孫孫女四余來閩特見親厚實稱知己銘公墓庶無媿詞銘

曰
維曹之先實相漢初彬璋佐宋積慶有餘公承奕葉克著令譽紹治行
譜高龍溪閭偉績昭焯中外建旗

皇帝曰俞汝欽往諸公拜稽首敷奏玉除敢弗勉旃終始勿渝敷華垂
實覃及海隅德載於民仁流若疇垂裕後昆材集瑾瑜將益光顯用報
碩膚

宮方伯爾勸暨元配李夫人合葬墓誌銘錢謙羣
歲丙子余訪雅雨廬使君於邗江始識滇南方伯宮君怡雲方伯雅雨
鄉人也時方伯次子去吝官我浙迎二親就養後去吝以卓薦遷漢嘉
太守方伯老蜀道遠且險不能赴子任僑居構李時與余往還余聽事
前植海棠一株春暮花盛放君過而愛之自後歲逢花時風日恬暖君
輒命子去矜侍杖履過余席花下命觴賦詩談讌極歡而罷蓋余與君
相識晚而十年來寓公地主互酌倡過從情味甚厚乙酉仲冬君病卒
於僑居正寢余年長於君衰亦甚力疾赴哭且唁二子他日二子及余
門稽顙請銘君墓不敢辭按狀君諱爾勸字九敘晚自號怡雲先世自
鳳陽徙居萊州之高密縣高曾以上代有隱德聞人祖廩膳生諱某父

碑傳八十四

六

諱某順治戊戌兵部進士歷官南昌銅鼓兩衛守府祖父以君貴皆贈
如其官君少而奇穎二十補博士弟子二十四舉於鄉以縣令起家歷
郡守擢監司晉方伯始終服官滇南所至著有聲績君下車恩樂時縣
舊隸土司君為第一流官與利弊綱舉目張善政不能悉舉其最大
釐定錢糧較初辦善後章程者減十之五六力請於上官得行去之日
邑人為立生祠以祝繼同知開化日烏蠻梗化王師討賊君獨力辦軍
精事叢集如蠟毛敏手擘畫了無滯屣履糗糒芻菱百所需咄嗟立
應文武大吏交相倚重事竣議敘一等軍功旋知開化府事普思元新
諸大案君悉心鞫問開釋矣刁兩家無辜被誣陷者百餘口又營弁緝
賊不獲俘良民八九十人以獻將定爰書君廉得其情申雪誣枉逮繫
之眾賴以全活在監司任十四年請奏免無着之墾本水冲沙壓苦累
之錢糧賑荒以銀易米俾白為通融災民便之後遇賑舉以為例丁卯
人覲昇任屏藩又兼攝臬司出納會計刃虛絲理苞苴不入吏治澄清
而於徐卿一案慎恤加嚴肉之白骨又神明長孫常平之法調劑損益
至今迤東西猶頌德勿衰于定國決獄多陰功杜元凱度支稱武庫足
以方之君生平遇事不矯厲以為能不選輒以至儆句稽賦稅平反獄

訟精敏廉幹物無有遁情者而於端風俗正人心崇學校講農桑尤汲為先務仕宦三十餘年家無長物喜讀書無他嗜好著有南溟集行世每風雨過從惟見端坐手一編訓子孫以忠孝敦厚易簣前數日子視疾於牀第閒君自知不起猶執子手論詩澹定自若其古成德君子乎夫人李氏奉姑相夫訓子不愧名家女先君五月卒子二去矜去吝俱賢而有文曉習吏事能繼君志孫四人曾孫一人將於某年某月某日扶柩歸里合葬於某原銘曰

猗猗孤桐產彼嶧陽材中琴瑟貢於明堂器成才贍遠牧蠻方作屏萬里流澤孔長晚歲解組教忠子舍不倦於勤分陰是藉與古為徒執德愈下七十八年修己隨化寓公生平心迹瀟灑雲馬風旗歸依東海用妥雙棺互千百載子孫繩繩松柏鬢髮

劉先生士銘行狀

朱翁

同府劉君光汾述其尊甫鼎彝先生之行而乞余為之狀且言曰光汾生晚先君子歷官所至之跡在人而卒未嘗一為其子弟言光汾蓋竊得之六親之長者不能詳其所以然也而又不敢誣之以所不能詳子善立言者其為光汾實以文之余不文不獲辭狀曰先生諱士銘字鼎

彝傳八十四

七

彝順天宛平人曾祖諱馨遠祖諱贈中憲大夫山西朔平府知府諱世隆父誥封中憲大夫山西朔平知府晉贈中憲大夫湖北驛傳鹽法道諱繼芳先生之父贈公初自保定之雄遷於順天之路長新店借妻朱宜人躬耕西山之麓而以讀書督其諸子有子三人長若愚次以成先生其季也早慧強記誦聞郡有藏書家輒往假手錄其本閒走書肆索觀故書立盡其卷不錯一字而歸以校讐錄本之善否里中耆舊咸嗟異之蓋自是終身得暇未嘗手釋書也長新店距京師之廣甯門三十餘里先生年十七行遊京師慨然曰盛哉乎人文乃移家入都門到白紙坊東購屋數楹於初張之街以為讀書之所而請業於常州謝先生某出遭賢通長者與之遊自是學日以肆當是時康熙五十年間文治修明物力豐美京師始稱極盛諸名流置酒召客排日為文社而先生年最少與諸老宿相往復至輒傾其座人歲丁酉先生年二十矣以國子監生應試舉於鄉卷出同考編修閩陳公治滋房而座主則為倉場侍郎儀封張公伯行編修滿洲鄂爾奇公一時榜下相傳得士曰米君米君者即先生也後始復其本姓先生既鄉舉負盛名未嘗有喜色既而再試禮部再不第其色如初謂所知曰吾將益讀書求所以至乎

古人者伯兄聞之謂先生曰弟讀書不自苦甚善然父母老矣日夜望弟一官博一笑弟亦讀漢毛義傳郭先生瞿然爲之改容於時歲壬寅始入費謁選司明年癸卯始檢發山西省試爲令其年知聞喜縣聞喜故劇邑會政弛吏偷逋賦累歲而催科急民益大困先生至則召縣之父老謂曰令拙於催科而民賦不輸是欲見令拙也願與父老約行滾單法何如滾單法者縣出單書賦戶名先甲次乙甲受單輸賦畢而單至乙乙受輸之如甲以次及於一縣賦戶畢然後上單於令者也父老則頓首曰如約於是先生爲書催租役於單首行之如法國賦歲人民無謗者又縣故有市集所在迥遠盜竊發爲買遷患先生下令改市適中之所民大便利盜賊亦罷去民爲立祠祀之至今歷攝臨汾蒲州解州戊申擢太原府同知兼攝知平定州尋授朔平府知府朔平地連北邊蒙古部人與民相雜處而郡又新設民屬府而蒙古人隸都統戲下訟輒牽掣號難治先生則以禮往謁都統與之談謙極歡曰某奉命來從公偕治

天子人自今誓不得畫彼此界都統卽前執其手曰惟公治之自是蒙古人或暴恣先生立杖決之久之帖然而民賴以安庚戌七月以母憂

當罷有

碑傳八十四

八

旨在任守制先生力請反葬而後赴職

許之戊午十一月父歿去官兩喪並哀毀如禮辛酉服闋補湖北安陸府知府楚俗悍詐獄成則抵罪而情或不寔先生苦心讞鞫多所平反漢江在府城西上去襄陽七百里下去沔陽七百里水自北來逕石城西南與大江合白石城下抵蔡家橋板橋灣由馬公洲小河口以達於南河迴折三百餘里土人謂之紅廟堤最要害在昔石城遠近湖港支分用洩水勢其後日以堙塞而捍水者獨恃隄不固則風巨霖夕一蟻所盜千里爲壑先生躬親相視滲洩與役夫同勞苦其課工視引錐穿土毫髮不損乃已郡人喜曰我公不寐我民安睡矣會興縣孫文定公以總督兩湖疏請調公知荊州公曰某得荊州人以美官賀某豈此閒有所利耶問府四關有東中西北徵稅處卽令曰商賈自入庭中投所稅錢於櫃役是土者不得與又問駐防兵丁糧餉故事自府支給不得他有所代令兵丁曰月至府支餉二日支糧三日至期一如所支各罷去諸邑或請曰公若少通自便亦以使人先生曰人之不便某任其

咎通則何敢乎以故先生在郡久人服其清聞攝理事同知時有姦其姊之女而殺其夫者事已私解先生訪按確實立置之法有兵丁在校場用火鎗誤殺伍人律不抵罪先生驗得鉛子於屍中訊得故殺狀抵之先生於所事雖非其專任未嘗苟己己已春奉

持命赴四川辦理臺站及金川平而還庚午八月授本省驛傳鹽法道鹽法他省價並畫一獨湖廣未有定式先生始令商價不得二且時取市中權秤親為較其舛兩輕重毋多取民利民方謳之明年辛未三月而先生以所轄驛站遲誤公事劾去矣初先生之被劾也同官有軋大吏以去者繼至者疑先生主使之輒撫細故以効先生且欲窮治其他事以聞卒無所得既而以先生在荊州十年於是更使蹤跡之亦無狀所使者走謁先生曰公誠賢者然上官使某蹤跡公無所得某無以報請公自書一二事告我先生曰某不肖不敢不自愛惟憶為婬使令節受商人花燈數物此破吾檢耳即書款付之所使以反命上官默然及按驛站所遲誤者在江南與先生無與人曰何不白之先生曰某服官三十年今以此釋負戴可矣復何求即日束裝北歸過其城喜百泉之勝為留半年其冬

傳八十四

九

聖母萬壽先生入都在都人祝釐之次有

旨給五品銜自是林居者且十年已卯仲子光汾官長興先生就養於浙買舟命杖往來西湖申久之不能去平生著述輒散佚惟西湖詩一卷獨存壬午遇覃恩以子現官例贈一代先生得晉封中憲大夫如其原官癸未六月元配蔣宜人卒明年甲申先生偕子光汾扶柩北還僑寓潞河之濱疾作明年乙酉正月且卒先生生於康熙三十七年戊寅三月十三日辰時卒於乾隆三十年乙酉正月初一日子時年六十有八先生束髮好讀書長明吏治所在有績而友於兄弟篤信於友生其大較也先生事兩兄最謹既仕曰某已得祿矣即舉郭西田盡歸伯兄而與仲兄俱之官所兄歿哭之累日不食子弟無敢勸者久始復初家故豐有饒業三萬金在津門屬一友為理之凡十年而先生罷歸問其業則空簿存先主笑曰某賞盡而子適成名足矣揖而去不再問也有山西范君與先生善輒通財先後資其金殆八千他人未嘗知先生官楚中聞范疾卽悉索所有得八千金命奴馳數千里抵范氏范已死獨其弟在辭不受曰兄臨訣未嘗言此且家無券也奴以先生命固請卒致而去嗚呼先生取與之際又較然如是是可以風已男子子六人光漣

國子監生雲南東川府經歷娶胡氏光汾乾隆壬申順天鄉試副榜舉人浙江湖州府長興縣知縣娶楊氏學海為先生仲兄某後娶王氏光潞娶張氏並元配蔣宜人生光漢娶婁氏側室張生光側室沈生女子子五人一適順天府學生大興徐密次適新安縣學生管煥章三適國子監生侯選州判永年冀方烜並蔣宜人生四五並沈生謹狀

太僕寺少卿介先生錫周墓誌銘

陳宏謀

者余官吏部玉潮為驗封司郎中屬

朝廷發帑金二十萬築室宣武門外隙地以為士大夫邸寓

命余董其役余素知郎中質直可信以其名上聞俾任監督初不知其為同鄉公子郎中聞公疾篤乞假歸省而訃音已在途矣奔喪成服後

以工當報竣復來京請余銘罔卿之墓余素不善文今衰耄更不能文

玉潮曰知公之文不輕為人作也顧先人自邑令至司臬皆在黔中公為滇藩滇黔接壤軍務方興先人撫苗運糧有實蹟公知之悉為先人

志墓必不同泛泛子因此乃知玉潮為罔卿子而罔卿官黔政績實有

碑傳八十四

十一

運軍糧攀崖破箬遇逆苗千餘眾方洶洶夫役棄糧欲走公厲聲曰夫

糧法當死犯苗亦死於法毋甯死於賊願與爾等同死佩縣印整衣

冠策馬徑前糧夫擁馬而進逆苗相顧駭愕各鳥獸散人莫知其所以

然既而烏蒙獠夷復叛川苗應之滇南獠亦反由水城趨平遠以攻安

順公時為平遠牧往撫大定苗而平遠得以無患雍正十三年古州苗

亂陷黃平清平驛路俱梗公方赴大定守任羽書交集咸云土酋安國

賢與古州苗通克期犯貴陽大府即日遣川兵來安酋所轄地九百里

眾且駭莫知所出公立召安酋至宣布

聖主恩威厲聲曰汝果通古州賊耶我今來汝果反川兵踵至我能殺汝安酋叩首伏地泣陳無交通古州苗狀公亦偵知為塘兵妄言所惑諭安酋曰汝能率眾苗就撫我以百口保汝不死並止川兵無來時丹江亦正危急公乃請川兵往援丹江丹江之圍藉川兵以解大定知川兵不來安堵如故大府今為大學士尹公稱其有膽有識極加器賞焉南籠有無籍民王祖先者以書符惑人播為逆詞又有粵西農民王阿耳為寨長王文甲所執竄入苗寨即誣文甲將糾合冊亭諸寨以叛二獄同時具滇黔粵三省騷然囚繫南籠獄中幾不能容株連累千餘人

時舍上納陽諸寨多逃苗公奉委馳往南籠會鞠得其情科罪魁立釋
文甲及繫累諸人文甲歸而逃亡者亦歸惶惑者安矣一時文武官僚
咸服公爲人所不能爲不肯爲不敢爲不惟省卻濫刑無辜生靈免遭
誅戮兩省良善不致波累皆藉公詳慎鎮定之力也黔省新開鉛廠五
方雜處廠民以口角忤委員因卽以聚眾罷市具報公直抵廠所審察
情形以廠民故眾眾不待聚廠非市市無可罷二語覆稟上游見信獄
立解黔中是歲軍餉計金二百四十餘萬楚粵來米八十餘萬石公以
知府攝貴東道總理諸路糧運其時鄰省解糧馬以三千計僱調民夫
以五千計屯集鎮遠漫無章程夫則坐糜廩糧馬則滋累里戶且多斃
者上游南籠諸府復役民夫加運九站兵糈又於下游銅仁諸府調運
夫二千餘公力陳三策以餘馬三千安臺分運凱里丹江諸路糧以現
夫五千按期包運台拱諸路糧楚粵兩省兵米則皆以水運有運至清
江者有運至古州都江者輓輸迅速糧乃大集於是止上游之糧運停
下游之調夫此舉也不下數十萬金所省民亦復無算故制軍有韓范
流亞之稱公之於黔所以籌畫軍需撫安苗眾大率類此其令畢節時
值歲大旱民嗷嗷待斃以小民輓輸之苦不及請示開倉借給七千餘

碑傳八十四

石乃具詳聲明身任賠補民得無饑次秋民亦爭償無爽而鄰邑之轉
徙者不少矣畢邑幅員遼闊延袤幾千里爲雲貴孔道向無站馬馬出
里中民有破產應役者公捐俸每站設馬四匹民得免役後官以爲例
至今賴之任平遠牧時前牧以重案繫獄眾公一一剖晰雪冤者百
餘人前有冷牧者政平訟理後爲少司寇州民謠曰前有冷公今有介
公以前牧姓冷而心則善慈公姓介而治則和平故以並稱也牧黔西
守大定其革除弊政勤理訟事一如畢節平遠時總理錢鉛火藥諸局
清理鹽政剔釐陋規通商裕課民亦獲利由貴西轉糧道於歲需兵米
折色出入公平不圖餘羨兵民感頌有以歷來相沿規例爲言者公云
吾非敢以此立名惟歸潔吾身耳亦不以吹求前任也此公之清而惠
公而恕豈俗吏所能希其萬一哉

特擢貴州按察使公在黔中久其吏治風土民苗疾苦素所熟悉設
推行惟以矜慎刑獄廣敷化誨爲事而性情耿介短於周旋因以老請
休

聖主鑒公志節不苟勞績懋著奉恩旨令其入覲隨補太僕寺少卿實
異數也閱三年告歸時荷

温旨存問辛巳入京恭慶

聖母皇太后七十萬壽覃恩加一級留都下七日還又四年而卒公諱

錫周字鼎卜由進士起家其先世德深厚七代科名世係官階已詳載

志傳中公孝友著於家庭爲善稱於鄉里甯人負已毋已負人義方之

訓惟以立身節義講求經術爲諄諄其醞釀之厚貽謨之遠求之古人

無多見焉故余樂爲之述其梗概以志於墓乃爲銘曰

赫赫廉吏以公以嚴撫綏維德惠政在黔訛言不驚我酋以生誣獄不

興我苗以甯壁立清標如砥如矢盍歸手來老不任使

帝曰毋然休勞逸賢於以錫之罔命之篇維爵維齒達尊備矣施於子

孫永無旣矣佳城安松栢丸丸同穴之固於斯萬年

永北劉方伯公慥傳補錄

公諱慥字君願號介亭以拔萃科貢國子乾隆丙辰舉順天鄉試時年

三十歲旋成進士入翰林授編修與修一統志出守順慶移重慶艱歸

起復補曹州調蘇州歷淮揚常通道福建按察使河南山西布政使屢

行巡撫事以勤官得疾歸七年而卒年六十一始公居永北三面皆金

沙江江民累淘金課其來久矣公爲諸生時傷其累思有以蘇之及爲

庶常因進書次白於

上卽爲減課之半夫雲南金課之病民勝國爲甚當其時大吏爭之羣

公爲論說賜之卒不能得公以草茅新進之臣忼慨直陳於殿陛數百

年之累遂輕想見我

朝之勤恤民隱無微不至而公之以忠誠自結於

上者先自於此其守曹州也會

上南巡召問郡事公以開濬河道四十八條繪圖呈進

上大悅謂公忠心誠爲今之賢守曹州簡小不足盡所長乃移知蘇州

自是歷監司分藩行巡撫事皆自於此此尤政治之大者昔漢史之傳

王景於循吏也詳著其爲府掾時修浚儀渠修汴渠之法以爲後世式

景後官日尊敘他美政俱從所畧蓋吏家輕重之體也當轉寄澍檢出

原奏以補之一子名裔彥舉順天鄉試卽澍之父也

論曰雲南通志所載漢三國人物數人混蜀黔而紀之未遂見爲雲南

人也五代唐宋元不見有人自明而來人物頗盛如方伯公同時諸公

皆錚錚然其沒也或有狀或未著於狀卽狀中而審於牽制不詳書者

多在以意會焉

中憲大夫何公達善墓誌銘

公諱達善字子兼號澹菴河南濟源縣人曾大父鳳陽公心存利濟製藥廣施活人於道路父孝義公性純孝嘗萬里尋親歷風霜十有九年卒遇父風穴寺自在菴事載中州卓行錄子三人長即公次復善丙辰舉人刑部福建司員外郎次樂善丙辰舉人今任膠州知州孝義而上世有潛德不仕至公兄弟而大顯公膺雍正丙午鄉薦癸丑會試中式乾隆改元殿試二甲改翰林院庶吉士

皇帝清問下民特降中旨選用考館高等堪民社之任者十人以縣令引見公軀幹魁梧奏對明剴中誠達於言貌

上顧而偉之初授廣東恩平縣三年報最乞近地以便迎養改陝西澄城縣推陞四川劍州知州丁父憂服闋補山東莒州陞江南徽州府知府轉江安糧儲道未赴督撫交章薦調淮徐海巡道公以文學起家遭

逢聖明由詞臣簡拔歷試民社累轉至監司中間三膺卓薦五近天顏屢

蒙

溫語褒嘉有金貂蟒服之錫思惟夙夜冰兢益厲清勤以仰答主知

碑傳八十四

十三

天子亦鑒公誠一時恩遇罕與為比焉初公嘗言親民之官莫切於州縣苟能實心任事於窮簷休戚痼瘵一體纖悉可以畢達不比府司去民遠又事多掣肘故其勤求民瘼於州縣尤為勞瘁在郡則精察下吏總大綱不拘成格惟務安靜民共享無事之福最公前後政績具載表狀行世不縷陳為撮舉立心大要嘗去莒州日莒民聞代官至遠近不期而會者萬人塞署門號泣官再三慰諭許為申憲請留久之乃得代即治效一端亦可以觀矣其降調也事緣海屬捕蝗不力降調例應赴部制府惜公賢奏留江南協辦差務

聖駕南巡於金陵行在召見

上前記公名顧兩江總制今相國尹公繼善曰此是好知府復還公知府官補鳳陽同知梅修河工報完大憲以侵冒題參得

嚴旨公奉檄查勘梅同知工有疎缺實無侵冒上憲怒將並揭徇庇公曰直道自在人心焉可誣危人以自安吾所不為會覆勘卒如公言公

仁心為質和易近人至見義勇為臨大事定大難風骨挺然不可犯類如是以痲病告歸乾隆三十四年十月二十日終於家春秋六十有六

大父諱騰龍父諱福全皆以公貴贈如其官配李氏誥封恭人於某年

月日葬某處季弟賢侯同人公來請銘按狀公家世孝友宦途三十餘年兄弟同居守先人舊田廬不改其素其居官也視民如子視國事如家事窮達一致古所稱豈弟君子民之父母者與銘曰大吉之姓歸胡有何何於四宗世德洪媿在昔三高曰點求允迢迢千載家聲繼引濟源分派未詳厥始敦本基仁慶由躬啟鳳陽孝義隱德陰功不下聞

浙江按察使李公治運墓表

袁枚

乾隆元年春湖廣總兵崔某劾大學士鄂爾泰苗疆失機是時鄂方以首相受

世宗遺詔輔政

天子怒下崔於理刑部九卿議崔罪斬立決右審司主事李公治運年二十餘獨持不可曰如是將啟大臣擅威福之漸崔因是得末減而小季主事之名震天下其年秋余薦鴻詞科入都受知於公父編修重華公世所稱玉洲先生是也得交公公狀短小豎眉秀眸微鬚爲人端靜詳審無多言終日坐騾車赴部決事他人休公不休以雍正七年進士授刑部主事遷員外再遷禮部儀制司郎中送琉球國使還主廣西鄉

試督山東學政俱有聲

碑傳八十四

十四

天子知公練刑名改授陝西榆林府知府尋遷湖北糧道安徽按察使調浙江公吳江人最鄰浙在浙八年民無聽請之嫌戚朋無矯情之怨人以爲難嘉湖二府連淞泖震澤漁匪竄焉公頒舟式而編排之盜風爲清紹興甯波兩府近海出洋者多爲姦公命州縣核其貨書其年月姓名按籍鉤考姦無所容常言例雖繁統於正律心能小自能活人每勤獄窮日孜孜爲求其可生之路巡撫某不悅劾公迂緩沽名

天子休公於家時太夫人年八十餘公得歸養頗以爲懽而浙之士民送者涕泣不能去三十六年七月枚過吳江公病已篤聞枚至力疾出見談天下事侃侃然蓋身雖衰用世之心尚在也別後一月薨年六十有二子會辰葬公畢來乞表墓且云公在浙平某獄甚善歸當取原贖相付已而書來檢寄無從以爲大感予謂會辰無傷也漢于公自言活人多後世當興卒其所活何人史莫得而詳也嗚呼此其所以爲陰德歟公字甯人一字漪亭夫人張氏子一女三葬某

諸授通議大夫山東提刑按察使司按察使原品致仕恩加一級沈公廷芳行狀

公諱廷芳字椒園本徐姓世爲仁和人自公考出嗣於舅氏沈遂承沈姓沈故吳興望族明歲貢生首賜始遷仁和於公爲六世祖康熙五十年八月公生於海甯之園華里幼端慤有志操嘗書其坐曰守道守身爲忠爲孝又嘗讀明楊忠愍公繼盛傳激昂慨慕思其爲人外祖查少詹事昇歎曰是奇童也卽異日立朝其風節自此見矣少長益潛心正業博綜羣典學以大殖弱冠游京師聲譽籍甚鉅人耆德接待若恐不及安溪李侍郎清植長洲惠學士士奇太倉張詹事鵬桐桐城方侍郎苞於時並申師友之契雍正十一年丁文昌公憂歸明年故大學士高文定公時總督南河聞公名馳書幣致諸幕府文定公素習有宋諸儒之學好賓接士大夫於公尤有加禮嘗謂公曰君年方少而博聞篤行遂至於是不圖今世乃見古人旣服闋再至京師補一統志館校錄先是

世宗憲皇帝詔舉博學宏詞公入都旣晚蟄居卻軌未嘗詣人求舉乾隆元年故左都御史楊恪勤公汝毅時以兵部右侍郎祭告南岳還朝上命續舉所知遂以公名及其學行對十月御試保和殿名在二等選翰林院庶吉士明年授編修入直武英殿同

碑傳八十四

十五

修起居注總理宗人府各學三年充一統志纂修官兼校勘明年殿試充收掌試卷官公嘗集前世君臣善敗之蹟爲類各十有六名曰鑒古錄以備法戒是年冬表進

賜段四匹書交懋勤殿六年補山東道監察御史公精敏絕人諳悉舊典朝章國故官方民隱口陳手畫本末如流通於當世之事而務出於

忠厚上承

世宗勵精之後益思勤恤民生周知疾苦采納直言慨然思古陽城馬周之選於時西林鄂文瑞公高安朱文瑞公海甯陳文勤公興縣孫文定公江陰楊文定公後先繼長朝列用忠清公正弼成至治而以卑官後進與相應和凡所陳奏尤在於奉宣德意成樂物生七年以淮安鳳陽徐泗諸府州連遭水被請於常振之外盡發常平諸倉存穀備爲振卹並加振直隸山東浙江甘肅之被災者又以國家設關徵稅益以抑逐末之民且使國用所出不專取給於農畝而已然米豆者百姓所仰食正使逐地流行乃以收通工易事之利况登場之日旣徵其地丁漕糧以充正供則關稅宜在可免奉

旨允行戶部議以米豆既免正稅請將載米豆之船加稅船料公復奏言米豆之稅免而載米豆之船料增是猶二五之與一十也

朝廷如天之仁所爭豈在此請並米豆之船料除之奉

旨交九卿議行焉其後公外轉有司遂復請稅米豆如故時蓋自潞野關監督始其年秋

上幸奉天公奏言邊地風氣早寒七八月閒已如冬令且山川紆阻跋涉疲勞

乘輿遠駐塞垣蒐簡軍實惟冀於闕武之餘勿事馳騁田獵敬慎起居

以迓釐福又因直省米價加昂有

旨停鄰省采買公奏采買以充積貯既楚弓楚得且有成數可稽惟海

洋物產富饒珠犀羽象之美掌握兼金而洲嶼沙石盤互斥鹵礪礪穀

生不蕃不得不資之內地商人沒於重利往往冒禁輿販近口之地民

閒倉廩爲之空珍異日至民倉日少是棄有用以博無用也且使無賴

之藏海島者得食以植其黨爲患方大事下部議申禁又言自古建立

都邑旣設支輔又必廣樹藩籬漢唐都關中而朔方河西常列重兵其

已事也茲聞三廳獨石諸邊盜風少熾

特遣大臣督緝分察疆理伏考老哈河喀喇河屯興州河及鄂爾多斯

諸處爲大甯開平興和東勝舊地今則八旗察哈爾禮部太僕寺考牧

之區外接諸藩內偏獨石口此皆膏衍土地水土甘美請就其中置屯

牧務一所遣大臣爲總理擇司員分領其事度今在京滿洲閒散之丁

碑傳八十四

共

議駁旋奉

旨交議政王大臣議奏卒格不行時東南連歲米貴公以采買旣停倉

儲尙寡請將乾隆九年江蘇安徽浙江江西湖北湖南六省漕米截留

特旨施行

上將幸末蘭會久雨水潦氾溢公言車駕所及一事不欲以累民而有

陵禮成加查所過地被

旨申飭部議革職

旨申飭部議革職

旨申飭部議革職

上命降二級調用十年奉

旨仍以御史用補江南道監察御史奉

命巡視山東漕糧十一年請建祠祀宋臣謝枋得於憫忠寺又以長生

店涿州積水泥濘行旅苦之請飭行修治並請加振直隸被水窮民俱

報允十二年充順天鄉試同考官再

命巡視山東漕糧公以山東比歲告饑雖屢截漕加振恐民氣未舒奏

於南漕抵山東時更截留六十萬石又奉

命隨大學士高文定公查辦山東振務公分理兗沂曹東昌泰安五府

城市窮鄉莫不親履條理精密吏不能欺五月閱青苗七月勘水災故

事山東巡漕御史率於六月回道至是於九月始復

命云公爲御史前後六年凡有屬草輒閉閣齋戒如對明神憂勤忠愛

之心發於顏色溢於毫楮其言體事達情曲折盡意公貌清古秀削身

裁及中人與人言煦然若不能盡及當事執持廉直自將雖賁育無以

過故尚書彭維新復官工部右侍郎公奏劾罷之尤爲人所稱道所上

四十餘摺舉其要者著於篇其未發科鈔者世固莫得而知也轉分巡

山東登萊青道布政使司參議舊時爲吏者飲食百貨之用取諸市予

賈恆十之五謂之官賈賓客僕役或因爲奸利公至勒石爲約悉革其

弊管內當積荒之後人士流離公率其屬釀養廉數千兩招集逃亡給

本錢使復其業數年戶口充實所墾田皆大熟置漏澤園募人收掩四

境遺骸小清河自新城孝婦河以東經高苑入青州境屈曲三百餘里

至壽光入海河道淤狹夏秋水暴發高苑博興樂安諸縣田廬累經

漂沒公相水勢濬馬車瀆口以上某千某百丈相地勢增築堤堰水屬

理孫民以無恐萊州老儒高鳳起法坤厚毛贄並晦名樂道不涉世流

公徑造其廬待以賓師之禮相與蒐訪舊聞考訂學業由是人知所矜

式暇日以一騎入村落巡行稼穡問民所苦即田間集父老子弟而教

語之或以村酒果餌進欣然食之至盡既久公所乘白馬人皆識之見

策白馬度陌者則喜相告曰使君至矣故老言先時陳恪勤公鵬年在

江甯陸清獻公隴其在嘉定固皆如是

國朝百餘年來得公凡三人而已遷河南按察使祥符民有淫入之婦

而殺其夫者既乃以語婦婦告其夫之妹使訟之官有司引律因奸致

死本夫婦雖不知情亦絞公曰本不與謀又獄由婦首是無死法巡撫

及幕客皆執不可公披舊牘歷三夜得成案援以定讞婦竟減等鹿邑

碑傳八十四

七

民甲殺人而賄乙誣服公察而直其罪其他平反閱實類此十九年十二月入觀

上以查太淑人年九十特賜御書曰壺範遐齡明年春乞終養歸其秋太淑人卒公素不喜佛老說至是居喪遂屏浮屠法不用並廢七七之奠服闋補山東按察使公謂愚民畏法其犯罪或出於不知乃舉律文之日習而易犯者陳列罪名以爲條教它所奏變通法令數事俱見施行時巡撫方操勤吏職公雍容儒者見爲迂緩又嘗發民治道公故寢其事由是滋不說適公奏請祀故尚書湯文正公斌於孔子廟廡又論孟子廟配饗事二十七年

上南巡至山東以公年老命以原品致仕公起諸生至大官諫行言聽膏澤下於民於公不可爲不遇然緣公體國之忠與其憂民立事之心蓋嘗抱無窮之蘊而惜乎公則衰矣公之歸生儒者老數千人南送四十里至嶺山驛不去皆曰使君前者去牽不數歲復來今當以何時歸耶使君壽考無極它時幸得相見公下輿慰之曰荷父老意甚厚其歸善教訓子弟力田孝弟爲良民奉上法度何必使者常在此耶使者亦願父老自今歲有康年無生災害與使者共食此福皆列拜流涕日暮

神傳八十四

六

乃散公在官食不過一肉三族之待以養者數十家既歸貧不能自贍復以課讀爲業累爲鰲峯端溪樂儀敬敷四書院山長嘗謂其門人汪中曰吾通籍三十年有宅一廛萊田二頃故既老而終歲教學於外汝以吾爲得已耶中對曰古者七十而致仕大夫爲父師士爲少師以教於其鄉蓋與司徒樂正之官相爲用血氣不足以任職事而道德則可以爲師然則師者所以息老也是故君子生而有益於人者不使其身一日無用於天下公頷之公爲教善囚人之材使人各盡其長然後授之以其事故多所成就篤念故交於通門子弟及名臣節士後尤加重自初宦迄於老率如是三十年

上南巡賜公紵絲表裏三十五年與祝
皇太后壽賜段四疋公子世燁自雲南主試歸
上召見瀛臺從容問公年齒精力於是知

上之恩顧深矣三十六年與祝
皇太后壽恩加一級明年二月甲申考終於京師之椿樹三條榭衛公
子禮部主事世燁之郎公兩兒俱有學行與公少共艱苦後並偃蹇不
遇公奉事之無不至從子世燕官武陟典史公生死願恤之如子有孤

蚤殤爲立嗣守純伯兄無子先以仲子世炯爲之後世炯死無子復以孫守誠嗣之治辦方定而公遂沒公學詩於海甯查編修慎行及編修弟侍讀嗣璪學文於方侍郎並沖融醇懿稱其德量有理學淵源十卷續經義考四十卷鑿古錄十六卷文章指南四卷隱拙齋詩集四十卷文集二十卷盟蒙雜著四卷其十三經注疏正字八十卷則嘉善浦鏗同校公由庶吉士授編修兩官監察御史出爲山東登萊青道參議河嶺白首無違子世燁庶吉士改禮部主客司主事明達負氣得公之節世炯世燁並先卒孫守正守誠守純守端公官在三品不得請諡於考功謹具歷官事蹟上翰林院

汪中謹狀
國史館論撰伏惟鑒察乾隆四十年正月某日門人江都縣附學生員

雲南迤東道錢君受穀墓誌銘 王昶

君名受穀字黃輿一字冲齋浙江秀水人曾祖治祖槃皆不仕槃生爛嘉興縣監生以才名中年應順天鄉試授經於今大學士誠謀英勇阿公後病歿於京師以君貴三代皆封贈如君官君孤貧無以爲家隨母

嚴太恭人依世父母以居錢文端公陳羣君宗老也勸之學君遂刻苦自勵補秀水縣學生沈編修昌宇督學廣東君往依之編修卒於任復從甘肅謝太守某於安徽轉至肅州逾二十年始歸里乾隆二十二年

南巡君以賦上行在

召試賜舉人授內閣中書舍人時英勇公以參贊大臣入爲工部尚書而錢文端公子汝誠以戶部侍郎兼順天府尹方貴盛交口推君常熟

蔣文恪公溥遂廷之賓館俾典書記後二年庚辰成進士改庶吉士明年散館授戶部主事兼管錢法堂事務君通籍後廉介食貧茹素不異

諸生居宣武門外距文恪公第十餘里徒步往來未嘗僮簿策車也所居矮屋五六椽蘆簾土銜與圖書間雜坐客無甑不惜也旣爲曹郎精

心吏治尚書兆公惠侍郎安公泰咸稱其勤能二十八年擢員外郎是

時天津淀河水積日久淹及田廬兆公奉

命治河以君從疏濬半年積水遂涸二十九年京察一等入直軍機處

三十年擢郎中充湖南鄉試副考官三十二年擢陝西興漢道是時雲

南徵外緬甸跳梁總督楊應琚弗能制

上命承恩毅勇公明瑞爲將軍兼總督討之陸辭奏請從事

詔以戶部郎中馮光熊吏部員外郎傅顯河南開封道諸穆親及君參其軍君被

命由漢中馳入雲南抵永昌授東道旋調糧儲道九月明公督師自永昌發君從之出宛頂撫木邦大鞞蠻結破柵十六踰天生橋入象孔迷失道趨大山猛籠就糧賊躡之三十三年正月麇於蠻化賊來益眾事亟明公屬君護案牘先行遂歿於陣君同潰軍入關調迤西道明年七月定邊右副將軍偕經畧傅公恆復進兵奏君駐蓋達接應糧運暨警報往來連月大雨君日夕在泥淖中凡五月而竣事師旋又留君於虎踞關監守官兵且收糧儲之在各站者又明年二月復署迤東道是時各關尚戒嚴而總督常駐永昌君亦綜理軍需局事年餘以積勞卒於官君生康熙五十四年某月日卒乾隆三十七年十月十一日年五十有八娶某氏子二昌祺昌壽君卒日篋無餘財總督率其屬賻之乃得貲棺以歛而歸其喪於秀水君長身戍削疎髯而壯於頰望之蒼然若河朔人奔走四方習於勞勩故其居官也爬梳繁劇必盡其宜聲色嗜欲之誘一無可動而山川之險阻風雨之跋涉兵戈之間關轉輾怡然處之每日五更輒蹋壁背誦少時所習古文詩賦長篇不遺一字迄曉而止蓋君之不自暇逸如此君與余同

碑傳八十四

召試同直軍機房又先後從軍於滇故得君之詳無如余者余以四十年四月自蜀還朝而君之卒踰三年矣昌祺等將以某月日葬君於秀水縣某原狀來乞銘乃銘曰
少貧而孤厥苦荼也長而經營四方厥殫筋也晚而從戎以大終也其廉吏其志士也矜此勞人信煩冤也

